

寒松堂集
二





寒 松 堂 集

(二)

寒松堂集卷二

奏疏

貴州道 都察院 順天府 戶部

巡視北城貴州道監察御史臣魏象樞謹題。爲教化係國家根本之圖。謹陳愚見。以佐大政事。臣家居時。曾抄讀上諭。謂至治之世。不專以法令爲務。而以教化爲先。蓋法令禁於一時。而教化維於可久。若徒恃法令而教化不先。是舍本而務末。臣讀未竟。而知皇上欲教化之大行矣。竊思朝廷之教化。安能家喻而戶曉。惟共分朝廷之教化以爲教化。自能端本以澄源。是在滿漢諸臣之爲父兄者。家自爲教。身自爲教也。何也。滿漢諸臣有爲我太祖太宗培植者。有爲我世祖培植者。有爲我皇上培植者。皆受朝廷高爵厚祿。與國家休戚相關。其子弟或進士舉人。或貢監官廩。以及世襲之胄裔。一命之職官。約略計之。幾半天下。內而部臣。外而民社。無一非皇上責成重託之人。較之民間愚子弟更爲緊要。如父兄孝則子弟必孝。父兄忠則子弟必忠。父兄廉則子弟必不貪。父兄仁則子弟必不暴。蓋父兄居家居官。子弟習聞習見。如標然。標正則影正。標邪則影邪。此之謂身教。孟子云。身不行道。不能行於妻子。又安望子弟之道。行於國家耶。夫以四海之大。八旗之廣。賢父兄賢子弟固不乏人。儻父兄所爲不正。子弟視爲榜樣。尤而效之。或馳情於聲色。或薰心於貨利。或旁惑於異端邪說。或深溺於驕奢奔競。如近日所謂打馬弔關。混江之類。

尤壞人心。此避人之事。非父兄其誰察之者。設異日以不肖之子弟。作不肖之臣子。國家竟不獲人才之用。是子弟之負朝廷。實父兄之負朝廷也。臣曾蒙世祖章皇帝頒賜勸善要言一書。提醒人心。言簡意盡。如晨鐘發省。冷水澆背。讀之未有不知非悔過者。伏願皇上重製序文。再頒內外滿漢大小臣工各一部。令父兄先讀之。凡有子弟。日講一條。養其性情。正其心志。一家之教化。卽朝廷之教化也。教化旣行。在家則光前裕後。在國則端本澄源。十年之後。清官良吏。君子善人。皆從此中出。將見人才日盛。世世共襄太平矣。如不以臣言爲迂。伏乞睿鑒。採擇施行。爲此具本。謹題請旨。奉旨。該部議奏。

又

巡視北城貴州道監察御史臣魏象樞謹題。爲治河繫國家根本之圖。敬陳愚見。以蓄人才事。臣聞十年之計樹木。百年之計樹人。今日治河一事。不可謂非百年之計也。受茲任者。與直省督撫原自不同。蓋督撫之任。事事有例可循。有案可稽。然猶慎擇其人。誠重之也。而治河則尤重焉。蓋所費者朝廷數百萬金錢。所運者朝廷數百萬漕儲。南北之咽喉。軍民之命脈。俱繫焉。其決也無一定之地。其塞也無一定之期。難以循例而行也明矣。苟非真才。未易勝任。曩來每遇缺出。或照常會推。或照常開列。以循資論俸之人。任淪海排江之事。一到河干。茫無頭緒。此處諮詢。彼處相度。略一嘗試。不知多少金錢。多少民命。已付之洪濤巨浪中矣。前此治河諸臣。塗飾補苴。且塞且修。二十餘年。今日估計。明日奏銷。綢繆未雨。能有幾人。潔己奉公。又有幾人哉。此河之大決。實有所以致之也。今我皇上夙夜殷憂。一切奏請。無不俯從。責在河

臣王光裕務殫心力。蚤慰聖懷。然後不負任使。臣思以後治河之人。原非臨時猝辦。其人必有歷練之才。洞達之識。清廉之守。強固之身。缺一不可者。且於河之分合高下。緩急節宣。無不洞悉於胸中。然後可責其成效。此一官也。蓄之在平日。用之在一時。河可百年不決。人不可一日不備。如治兵然。未有臨敵而始求大將者也。臣愚以爲治河乃工部職掌。治河之人。卽工部專責。伏乞敕下工部。留心確訪。凡滿漢內外大小臣工。果有諳習形勢。素負才能者。具疏保奏。仍乞敕下九卿科道。再加覆核。才品確有實用。請旨下吏部註冊。其職品小者。遇有管河員缺。酌量推補。練其才以待用。其職品大者。遇有總河員缺。酌量開列。取自審裁。展其用以圖功。臣所謂百年之計。樹人者此也。儻所保徇私。治河欺罔。加以連坐之罪。庶數百萬金錢。不致浪費。數百萬漕儲。不致艱難矣。如果臣言不謬。伏候皇上採擇施行。爲此具本。謹題請旨。奉旨。該部知道。

又

巡視北城貴州道監察御史魏象樞謹題。爲藩司之侵蝕敗露。撫臣之察核欺蒙。謹據疏糾。恭仰乞睿鑒處分。以清吏治。以肅法紀事。臣從田間來。伏見我皇上勵精圖治。宵旰不遑。擢用督撫。其難其慎。總爲吏治不清。民生未遂耳。在直省督撫諸臣。各宜力去欺蒙。發奸摘伏。庶可仰答擢用至意。近見湖廣撫臣徐化成。察核藩司劉顯貴。司庫錢糧有收無存一案。大有可異者。夫顯貴有收無存之銀。計二十六款。共銀九萬七千七百餘兩。旣經署司王孫蔚舉出。奉旨察核。錢糧重大。情弊顯然。一毫徇庇。便爲罔上。今撫

臣稱顯貴查開十四款。又與原款不同。臣思錢糧各有款項。今顯貴所開。既與原款不同。節年作何奏報。戶部作何核覆。豈前日造冊者。另一顯貴。今日造冊者。又一顯貴耶。况錢糧造冊。有舊管新收。開除實在四柱。今撫臣竟以四萬七千八百三十餘兩。稱爲虛報。重收未銷。又以二萬七百四十五兩。稱爲可抵之數。如果有未銷。可抵情節。方造冊交代之時。顯貴並未聲說。及去任質算之後。撫臣反代請抵銷。竝挪移二字。諱而不言。將誰欺乎。且勒令本官賠補者。有二萬九千一百六十九兩零。明係侵蝕。與監守自盜何異。撫臣反云侵蝕。委無可指。止以舛錯混淆四字。輕描淡寫而已。凡錢糧在庫。造冊未明。謂之舛錯混淆。今庫銀無存。而但云舛錯混淆。又誰欺乎。按例州縣等官。錢糧不清。不敢離任。顯貴爲一省錢糧之總司。庫中錢糧無存。將至十萬。輒敢公然離任。若非署司檢舉。則顯貴之應賠補者。終成侵蝕。竝顯貴之優舉卓異。終成舛錯混淆之卓異。顯貴之內陞京堂。終成舛錯混淆之京堂。國家有此法度乎。撫臣輕描淡寫。爲顯貴出脫之計。可謂婉轉。而獨不思朝廷國計民生之重。亦不自顧爲朝廷發奸摘伏之官。臣不能爲撫臣解。益不能爲顯貴解矣。臣入都未久。耳目未周。雖不敢以一事概撫臣。然就事論事。欺蒙可見。理合糾叅。伏乞敕部察議施行。奉旨。該部嚴察議奏。

又

巡視北城貴州道監察御史臣魏象樞謹題。爲畿輔盜賊日多。百姓受苦日甚。請專設滿洲督臣實心料理。以靖地方事。臣竊見我皇上宵衣旰食。無非安百姓至意。盜賊一日不息。卽百姓一日不安。我皇上安

百姓之心。一日焦勞未遑也。臣入都以來。見直隸盜案。多於各省。心竊異之。近日輦轂之下。如皇莊樂亭等處。馬賊成羣。肆行無忌。大爲地方百姓之害。雖盜案處分。可謂至嚴。而巡撫總兵副叅遊守。及駐防章京等官。非不星羅密布。未見防禦擒拏。其州縣有司。官微職小。無一兵一馬。惟有靜聽叅處。不敢過而問焉。此盜賊所以日多也。臣思直隸地方州縣。與莊屯聯界。滿漢雜處。稽察繁難。賊之器械馬匹。保無假借。聚散往來。保無窩藏。匪類交結。保無勾連。躡緝查拏。保無庇護。如臣衙門送刑部盜賊二起。俱有旗下人在內。其在刑部結案者。難以備述。久在皇上洞鑒中矣。臣忝列言官。不能不懇懇過慮。今再四思維。直隸地方盜賊。與他省不同。巡撫既不管兵。總兵不聽約束。且漢軍漢人。無約束駐防章京。及莊頭屯撥什庫人等之例。總督一官。最爲緊要。惟皇上特簡才品優長。不徇情面。不擾百姓。滿漢兼通。滿洲重臣一員。斯克有濟也。臣非不知設一官有一官之費。但爲地方百姓計。何惜小費。總督既設。宜將撫臣移駐眞定。專管通省官員賢否。刑名錢穀。其總督衙門。似宜註劄保定。總轄各總兵。及各城駐防章京。道府州縣衛所等官。並各莊屯地方等處。俱聽約束。則設防調度。盤詰擒拏。以專理盜賊爲職。以盜賊甯靖爲功。庶百姓賴以保全。地方從此肅靖矣。臣止知報國。言無忌諱。如果臣言可採。伏乞睿鑒。敕下該部。確議施行。爲此具本。謹題請旨。奉旨。該部知道。

又

巡視北城貴州道監察御史臣魏象樞謹題。爲百姓待命甚急。本年緩徵宜斷。恭請德音速布。以昭一代

之仁政。以垂萬世之史冊事。臣聞爲君之道。必須先存百姓。今日民窮財盡。百姓之困於正月開徵者。部憲科道諸臣屢疏言之。至詳且切。而夏稅秋糧終阻於部議而未之行。夫兵民一體也。兵窮則早給餉。民窮則早開徵。滿漢一體也。莊頭地漕便給半米半銀。百姓納糧。不論耕田下種。所謂一體者。安在。臣竊爲戶部諸臣不取也。去年我皇上躬侍太皇太后。駕往湯泉。恰在正二兩月。親見彼時地未插犂。糧已開徵。皇上至仁至孝。必由一方而推之天下。急定夏稅秋糧之制。不意又未之行也。及憲臣任克溥具疏再陳。戶部乃請敕各省督撫定議。設使各督撫有一語游移。部臣即可借口阻塞矣。今各省奏章雖未全到。而江南財賦之多。甲於天下。近如督臣麻勒吉。陳奏歲需之數。及通融撥補項款。竝百姓疾苦情形。又至詳切。臣知我皇上覽此一疏。必有惻然動念者。若必俟各省奏到。始議舉行。今年正月。勢必照舊開徵。百姓剝肉有司敲骨。以待來年。然後已。我皇上愛民如子之心。不忍也。況時屆春和。正布德行惠之時。我皇上躬耕藉田。祈穀上帝。凡以爲民耳。民之大困者。莫大於正月開徵。甦民之大困者。莫大於夏稅秋糧。早行一日。民即受一日之賜矣。伏乞特頒上諭。傳諭直省官民。自康熙十二年夏稅秋糧。著爲令。永不許正月開徵。以定千秋萬代之常經。以昭聖子神孫之法守。俾海內臣民。歡呼踴躍。父老扶杖而聽綸音。婦子稽首而問耕鑿。從此盜賊可息。逃亡可復。我皇上心堯舜之心。行堯舜之行。此第一仁政。出自乾斷。萬世史冊。載筆有光。將臣原疏留中。微臣幸甚。天下幸甚。貼黃難盡。并乞皇上俯覽全疏施行。爲此具本。謹題請旨。奉旨知道了。該部知道。

又

貴州道監察御史臣魏象樞謹題。爲盛世貴舉旌廉之典。大吏尤爲率屬之官。謹陳愚言。以正綱紀事。臣惟朝廷鼓舞天下之大權。莫大於賞罰。賞罰明而綱紀正。心術亦正。乃可以治天下而不勞。竊見我皇上用人圖治。夙夜憂勤。裁去多官。專責督撫。委以吏治民生。責以清廉正直。蓋督撫廉則吏治清。民生遂而天下安。督撫不廉則吏治不清。民生不遂而天下不安也。語云。源清則流清。源濁則流濁。理固然矣。臣見我皇上每用督撫。簡在帝心。爲督撫者。既受一人之知遇。自當盡絕輦下之私交。欲垂不朽之勛名。何暇苟圖一身之富貴。其所以自勵者惟廉。而我皇上之所以勵之者亦惟廉矣。頃者京察既舉。臣讀我皇上留用之旨。止取才能勞績。而概未及操守。宸衷鑒別。非臣愚昧所能測。臣按周官六計弊吏。咸冠以廉。曰廉善。曰廉能。曰廉敬。曰廉正。曰廉法。曰廉辨。其一代好尚自見也。臣竊思盛世旌廉之典。卽一代之好尚所關。上有好者。下必有甚焉。若上以廉求。而下不以廉應。臣知其必不然也。今八法以貪居首。而四柱以守爲先。正可與周官之六計千載同符。我皇上所以鼓舞天下之大權。正在於此。卽古有清畏人知有清畏人不知者。獨廟堂旌廉之典。不可不重。曩來原以人情爲難保。不得不歸之分內所當爲。若謂行旌廉之典。反開賄囑之端。世未有肯賄囑而求爲廉吏者也。且人之德行有四。曰忠。曰孝。曰廉。曰節。今國制於忠孝節俱有旌。而廉不與焉。廉獨無益於國哉。况大計卓異官員。舉自督撫者。尙蒙賜衣優獎。以勵天下。今六年一察者。大吏也。日月照臨之下。未嘗特獎一二以示鼓舞。誠恐來歲大計舉行。督撫知操守似非

首重。開報屬員之賢否。止以才力不及等項爲去留。而國法愈弛矣。伏乞敕下部院確議。嗣後凡遇內而各衙門甄別考察。無論滿洲漢人。外而直省大計舉劾。無論方面微員。總以操守清廉爲上等。舉出數人。請旨旌獎。如知廉不舉及無廉可舉者。作何處分。以儆其平日不能表率之咎。其舉廉果多者。當優於多獲。逃人多捐銀兩之例。將舉廉之官。作何紀錄。其三品以上自陳官員。果有如上諭所云。律已清潔。屏絕餽受。恪恭職業者。仍乞我皇上獎廉爲重。不惜綸音褒嘉之。以昭一代之大權。卽以明本朝之好尚。布之海內。垂之典冊。斯爲盡善盡美矣。抑臣更有說焉。臣前所謂處分紀錄。就立法言之耳。如督撫真廉矣。屬官安有不廉之理。如督撫不廉。屬官雖欲廉而不可得。蓋教猥升木。使天下之盡爲不廉者。督撫之罪也。若不將督撫之大貪極惡。以重法處一二。雖有降級革職。猶能安享富貴。人將謂廉之不足爲重。而不廉者之賊至十萬。亦可一赦而免也。十年之後。麟鳳少而梟獍多。嗟此百姓。無以自存矣。法雖立。又將焉用之哉。臣故謂朝廷鼓舞天下之大權。莫大於賞罰。欲明賞罰。斷自崇廉始也。如不以臣言爲迂。統乞睿鑒。俯採施行。爲此具本。謹題請旨。奉旨。該部知道。

又

貴州道監察御史臣魏象樞謹題。爲督撫有不容不盡之職分。有不容不去之因循。謹因察典已竣。請嚴行申飭。以警將來事。臣惟督撫爲朝廷之大吏。計天下之封疆。田土。兵馬。稅糧。河漕。盜賊。察吏安民。不過數大政。然必公忠體國。潔己愛民。庶可仰副皇上委任責成之至意。乃究其未盡之職分。與未去之因循。

正自不少也。他不具論。臣曾捧讀嚴綸總督巡撫互相糾叅。雖有定例。數年以來。未見舉行。皆因督撫同在地方。瞻徇情面。互相容隱。雖知弊端。不肯舉發。大哉王言。炳如日星矣。如督撫有賑濟饑民。侵銀至十萬有餘者。有地方捏荒作熟。苦民邀功。不知惠養百姓者。有將奇貪侵庫之官。舉爲卓異者。有賄賣武舉。徇私不公者。其劣狀雖經發覺。久在皇上洞鑒中。而六年之內。未見特疏互糾者何人。以爲瞻徇。則真瞻徇。以爲容隱。則真容隱矣。此督撫之因循未去者一也。臣又捧讀嚴綸督撫任大責重。全在舉劾得當。使有司知有勸懲。今所舉的多屬冒濫。所劾的不過小官。苟且塞責。大貪大惡。反多徇縱。何裨民生。何裨吏治。大哉王言。炳如日星矣。如督撫身在地方。耳目與屬僚最近。歲月與屬僚最久。州縣等官受賄三五兩。尙掛彈章。何獨提學一官。考試通省生童。關係人才教化。未見特疏糾叅者何人。雖武途冒濫一案。奉旨嚴察。有別省冒籍者。有一人而冒文武兩途者。有銜役匪人濫收武學者。已經察出外。其文途大弊。從無發覺。果提學官盡屬公明。無可指摘耶。抑揭報糾叅者。自處於不公不明。欲指摘人而不能耶。言官原禁風聞。督撫又何禁焉。此督撫之職分未盡者一也。臣因已往而慮將來。恐久之不遵諭旨。習爲故常。以瞻徇情面爲寬容。以徇縱大貪爲渾厚。言官既無風聞之叅劾。各部惟循定例之處分。天語煌煌。究不能實行於二十七人之大吏。我皇上夙夜勤勞。所責成而委任之。及督撫諸臣。身受殊恩。所以報我皇上者。顧如是已耶。今京察大典。既經舉行。去者留者。悉出宸鑒。臣復何言。但雨露雷霆之後。正申飭告誡之時。乞敕部議。以後如有瞻徇情面。徇縱大貪。應互糾應訪叅而不訪叅者。當以悖旨論罪。不待六年考察。作何

處分。又各部之內。或督臣事發。應將不互糾之撫臣糾叅。或撫臣事發。應將不互糾之督臣糾叅。其事在某部。而該部不行題叅者。作何處分。再乞皇上加意用人。每一缺出。其難其慎。簡在帝心。務得真賢。委以重任。卽不得已。另行推補。幸不使地方有姑試而頻更之官。以致交代之際。吏胥作奸。迎送之間。有司多累。俾其留心職分。大破因循。潔己奉公。愛惜民命。庶綸音昭而法紀肅矣。如果臣言不謬。統乞睿鑒。俯採施行。爲此具本。謹題請旨。奉旨。該部議奏。

又

貴州道監察御史臣魏象樞謹題。爲歷指科臣罔上行私。喪心溺職。乞敕嚴加處分。以肅法紀。以清班行事。臣惟國家設立言官。原爲朝廷之耳目。知無不言。言無不盡者。職也。國爾忘家。公爾忘私者。心也。孔子云。臣事君以忠。又曰。勿欺也。而犯之。蓋忠者必不欺。欺者必不忠。一念之萌。立分誠僞。卽立辨貞邪。若於光天化日之下。連章累牘之中。存自私自利之心。進不公不法之言。度非臣子所敢出也。乃不意有兵科給事中余司仁者。則大可異焉。司仁初由舉人教職。拔置臺班。優陞京堂。復補科員。隆恩至渥。報稱難盡。臣入都之初。聞其曾巡兩浙鹽課。差滿回京。日以打馬弔鬪混江爲事。賭銀一空。官箴蕩然。臣心恨之。恐司仁不肯自認。難以糾叅。乃不得已具疏。有近日打馬弔鬪混江。尤壞人心。避人之事。非父兄其誰知之等語。蓋爲此等事言之也。司仁以素行不檢之人。濫陞京堂之席。未能返躬自愧。力改前非。每一進言。人皆訾議。曰。余給事又有本矣。他不具論。近如部差宜昭畫一。一本謂挖運廳稅務。戶部議定通薊道兼攝。

司仁力請歸併於通惠之部員。如果稅務有不便徵收之處。自有巡撫請旨。何煩司仁代請。或司仁聞有弊端。何不糾叅該道。而止泛爲條陳。即使條陳從公起見。何不曰稅務作何歸併。而竟曰歸併工部徵收。事關稅課。司仁力請歸併。是爲何心耶。又如鎮將必須得人。一疏謂通州副將員缺。請將該鎮所屬參遊等官題補。所遺員缺。達部另推。夫司仁既知陞補有一定之規。似不當爲一官請。即地方果係緊要。自有巡撫請旨。何煩司仁代請。况司仁照知州州同缺出。於所屬內題補。豈知州州同之缺。亦係吏科代爲題請耶。事關陞補。司仁力請轉移。是爲何心耶。臣各擬另疏駁叅。料司仁不肯承認。臣反涉於風聞也。近閱邸報。又有國家之大法宜嚴一疏。奉旨余司仁身係言官。若劉顯貴事情有冤枉。即應將劉懋耀原疏封進。既爲原無可辯。批駁不准。乃又欲提耿拱極及逃役劉仲佐再審。是何意見。著明白回奏。該部知道。臣捧讀之。知司仁膽愈大而手愈滑。我皇上已洞見其肺肝矣。乃司仁不從實回奏。靜聽處分。乃借劉懋耀之原疏。朦朧其說。既爲顯貴開卸有收無存之多賊。又以離任之耿拱極。在逃之劉仲佐。一提一緝。耽延歲月。爲漸求出脫之巧計。臣不知劉懋耀之疏。何故偏湊。司仁直日辯冤。又不知司仁何故於衆議批駁不准之後。留心顯貴一案。獨殷殷而不能忘。容鑒難逃。臣何多贅。臣竊謂言官之罪。莫大於有私。一有所私。而欺君罔上。壞法亂紀之弊生矣。今司仁具疏。上非國家之利害。下非百姓之疾苦。中非賢人君子之用舍進退。即此三四疏中。以察私之官而徇私。以懲貪之職而縱貪。歷歷可見。人人皆知。辱朝廷而玷清班。不獨堯舜之世。一日難容。臣與司仁。均言官也。司仁不忠而欺。一至於此。臣雖不才。羞與爲伍。而况臺

省諸臣之過於臣者。又當如何恨司仁耶。若不互相糾劾。則言路壞而國體國法俱壞矣。除回奏情節。已經奉旨。該部一併察議外。臣謹備敘司仁前後敗檢欺罔事情。伏乞乾斷施行。爲此具本。謹題請旨。奉旨。該部察議具奏。

又

貴州道監察御史臣魏象樞謹題。爲自請議處事。臣於康熙十一年十月二十七日。巡視北城。於十二年四月二十七日。已經差滿。於六月初十日。有臣同官賀爾渾等。爲題明盜案事一疏。吏部議覆。內稱應將北城賀爾渾。孟熊飛。各罰俸一年等語。臣查此案。因未知定例。於四月十八日。將接緝官應否題叅。移問吏部。其時臣尙在城差辦事。至差滿之後。同官具疏。例不列臣之名。但今同官議處。臣不應獨居事外。八月初三日。都察院將此案罰俸緣由。飭行北城。臣於初五日。抄知詳悉。謹將臣在差差滿月日。理合自行奏明。伏乞敕下吏部。將臣議處施行。爲此具本。謹題請旨。奉旨。該部議奏。

又

內陞正四品頂帶食俸。仍留管貴州道監察御史臣魏象樞謹題。爲朝儀祀典。禮宜嚴肅。謹陳舊例。以專責成事。臣惟臣子事君。視皇上之事天事祖。無二心也。我皇上躬行典禮。虔誠備至。儀文精詳。勳與古帝王合符。猶於致祭時辰。致齋處所。詳察典例。稽考往代。無非肅將誠敬。昭格神明至意。大小臣工。所當觀感於心。而愈加敬慎矣。臣先以朝儀言之。每遇常朝。除入內啟奏外。諸臣宜濟濟鵠序。不宜落落晨星。如

在午門之外。公服必具。不宜補服便衣。如在丹墀之內。班行必整。世祖章皇帝時。舊例凡隨旗官員。係吏部司官察點。其班中稽察者。則禮部司官同鴻臚寺官員也。行禮糾儀者。則臣衙門御史也。今各官辭朝見朝謝恩。兩班御史糾儀如舊。臣每見班行之中。止有吏部司務廳官收職名數箇而去。未見鴻臚寺官作何稽察。亦未聞吏部作何糾叅。獨諉之司務廳官。豈其職在稽察糾叅者哉。責成之例既變。因循之事甚多。此玩襲所由來也。臣請將稽察糾儀。各照世祖章皇帝舊例舉行。如有稽察怠慢者。御史竝得糾舉。以不敬論。則朝儀整飭矣。至於祀典所關。尤爲重大。皇上別殿致齋。躬詣行禮。諸臣德陪祀而不陪祀。應齋戒而不齋戒。諒必不能自安。但各衙門開註痰嗽感冒等病。真實者固有。假託者亦難保其盡無。舊例應具印信報單。先一日報糾儀御史。以憑稽察糾叅。近來報與不報。參差不齊。因而視爲故事。今後各衙門凡應陪祀官員。須用印信報單。封口交送糾儀御史。該御史於未祭之先。親收職名。不許班役代遞。俟祭畢對明報單。有不到者。照例糾叅議處。如報單不送及兩三次託病者。查出一併糾叅。以不敬論。今值朝覲在邇。而班行不整。何以爲萬國之觀瞻。郊祀將行。而駿奔弗虔。難以副一人之對越。茲蓋上體皇上誠敬之心。下體諸臣修省之義。不敢不申明舊例。儆天顏於咫尺。懷明威於夙夜者也。如果臣言不腐。伏乞睿鑒。採擇施行。爲此具本。謹題請旨。奉旨。該部確議具奏。

又

內陞正四品頂帶食俸。仍留管貴州道監察御史臣魏象樞謹題。爲制祿爲養廉之具。恭請酌情定法。以

體羣臣事。臣讀中庸。至孔子對君以九經之事。有云忠信重祿。所以勸士也。而知王道本乎人情矣。臣雖至愚。竊見我皇上忠信待臣之心。無一不至。卽增秩增爵。予封予廕之典。亦無一不厚。顧內外文武諸臣。潔己奉公者。雖不乏人。然而貪風未息。往往喪心敗名而不之恥。嚴刑峻法而不之顧者。何甚多也。臣嘗思之矣。朝廷欲行懲貪之法。必先制養廉之祿。蓋天下之宦京師者。房屋器用之需。妻孥僕馬之贍。惟祿是藉。卽奉命仕四方者。走數千里。莫不選舟秣馬。治裝裹糧。而後動。所攜之貲。非典則貨。亦惟祿是藉。孟子曰。仕非爲貧也。而有時乎爲貧。有味乎其言之也。今自一品至九品。每歲俸入。多者不過二百兩。少者不過三四十兩。此外雖京官有公費。外官有柴薪。俱屬無幾。苟非加俸。何以養廉。頻年國用浩繁。蠲賑時有。似難遽加。但六部所定罰俸。則例二百餘條。實爲至密。事簡之地。或可俸免。事繁之地。有履任一年。罰俸數年者。有在任數年。罰俸數十年者。有旣遷旣降。而帶罰而又罰者。臣子爲罰而受過。朝廷因過以示罰。固屬當然。其在不肖之輩。上司奪屬官之贏餘。屬官吮百姓之膏血。驕奢淫佚。何須俸祿。若夫守法愛民。勢所必至。人無廉恥。卽國無人才。我皇上爲諸臣之天地父母。生成養育之下。必有大不忍焉者。臣查見行事例。內外文武各官。有功則紀錄以示勸。豈有過者。獨不可記過以示懲。臣請我皇上酌情定法。略加變通。嗣後應罰俸三月。六月。九月。一年者。各准記過一次。或分別微小輕重四字記之。功過相抵。仍從舊例。俟錢糧充裕。量行加俸。旣變罰俸之例。乃有食俸之期。至於外官有柴薪。應將京官柴薪照例議復。

京官有月米。亦應將外官月米酌量議給。總以昭皇上曲體臣工之德意。而並不廢勸懲之大法。卽未必人人清介。其或貪人敗檢。自取罪戾者。則有皇上之斧鉞在焉。以此而昭垂史冊。當與九經相媲美。不獨文武百官犬馬圖報而已也。如果臣言不謬。伏乞睿鑒採擇。字稍逾額。併乞慈宥施行。爲此具本。謹題請旨。奉旨。該部確議具奏。

又

內陞正四品頂帶食俸。仍留管貴州道監察御史臣魏象樞謹題。爲教化首戒淫巧。民心務尙淳樸。恭請嚴禁。以昭美政事。臣惟我國家肇闢鴻圖。忠質爲本。自臣及民。樸重端慤。儉德可風。臣昔事我世祖章皇帝時。親見其盛。今我皇上宏開文教。光大前謨。以文明而行忠質。敦崇節儉。辨別等威。凡官民人等。宮室車馬衣服器具。各有禁制。定爲章程。邇來民間用度之奢靡。器物之淫巧。種種沿習。未返淳樸。其耗民財而壞人心者。莫如戲園戲館爲最甚。每開一園。其餽饌則山珍海錯。其侑觴則恆舞酣歌。其聚會則冶遊閒蕩之徒。與鑽營騙詐之輩。夫京師者。四方之觀也。士農工商。以至兵民人役。各有本業。自朝至暮。萬苦千辛。求其供衣食養妻子。而猶恐不贍。安有餘暇爲劇飲之時。安有餘錢爲浪費之資乎。入其中者。必是不務本業之人。食其物者。必是不費艱苦之錢。或朝得而夕費。或暗得而明費。約略計之。日費百金。月費三千金。歲費三萬六千金。從何得來。連年河決災傷。民窮財盡。卽在大小臣工。尙宜體皇上宵旰求治之心。爲百姓家給人足之計。一舉箸。問念及僻鄉下里。深山窮谷。身無完袴。日不再食者。不知凡幾。而若輩

乃暴殄至此。我皇上躬行節儉。天庖玉食。歲用無多。民間妄費。反無所限。亦何以爲四方之觀耶。况飯店酒館。處處便民。則戲園爲糜費之地。所當嚴禁者也。至於賣戲諸館。每處千百成羣。日聚暮散。賭盜爲非。莫可究詰。臣巡視北城時。拏獲賊犯計四等。供出同夥盜賊。俱係戲館夥計。一經發覺。在逃未獲。則戲館爲窩盜之藪。竝當嚴禁者也。且京城之內。優伶多至二三百班不止。以致民間後生。演習聲容。廢棄耕讀。臣曾見招帖。有富家子弟。班人心之壞。漸不可長。推之直省。莫不皆然。雖優劇有勸善戒惡之說。然必忠孝節義。資人觀感。凡坊間所刻淫詞豔曲。引誘人心。竝良家子弟。廢業演戲。所當通行直省。一概嚴禁者也。臣迂腐之言。如果與民生風化有裨。伏乞睿鑒採擇。字稍逾額。併乞慈宥施行。爲此具本。謹題請旨。奉旨。該部確議具奏。

又

內陞正四品頂帶食俸。仍留管貴州道監察御史臣魏象樞謹題。爲再陳記過巔末。竝陳給俸緣由。以廣皇恩。以定部議事。臣於九月十五日。具有制祿爲養廉之具等事一疏。奉旨。該部確議具奏。欽此。臣愚竊謂部臣仰體皇上崇尚寬大。愛惜人才盛心。必斟酌情理。確有定議。使內外文武各官。得免奪俸之苦。稍得養廉之資。既鼓其居官任事之心。無礙於薦舉陞遷之路。良法也。美意也。諸臣莫不翹首而望鴻恩。洗耳而聽部議矣。或者謂外官記過。則有紀錄可抵。京官記過。則無紀錄可抵。內外難以畫一。必付之無庸再議耳。臣因敢爲我皇上再陳之。若部議從嚴也。則有大清律在。查名例內文武官犯公罪一款。凡內外

大小軍民衙門官吏。犯公罪該答者。官收贖。吏每季類決。不必附過。杖罪以上。明立文案。每年一考紀錄。罪名。九年一次。通考所犯次數輕重。以憑黜陟。又文武官犯私罪一款。較重於公罪。俱開載甚明。此吏律之當行者也。若部議從寬也。則有故明會典在。查正統九年。敕禮部三法司。春陽肇序。萬物咸新。在京文武官員。除贓罪外。自正統九年十二月二十日以前。所犯過名紀錄。悉與湔除。俾奉公守法。自後歲以爲常。此會典之可考者也。今部臣覆疏。正在御前。未知作何詳覆。臣謹將大清律款及會典舊款。開具電覽。仰候特恩。至於京官俸銀。臣憶我世祖章皇帝時。原係每年四季支領。各照本官去任到任之日扣領。今忽改爲上下半年。二月八月初旬支領。如領俸之後到任者。將半年之俸不給。或領俸之後去任者。將半年之俸亦不扣。以情理論之。俱不可解。爲國家養廉耶。則在任而奪俸。無枵腹辦事之人。爲國家節用耶。則離任而食俸。有漏卮耗財之弊。若將司農會計之法。祇聽造物適然之數。何以載入會典。垂於萬世乎。雖八旗領俸。均係兩次。但漢官有內外遷轉。丁憂起復。給假補用等項。頗與八旗官員不同。如謂扣算包封之煩勞。在世祖章皇帝時。既可行之。今何不可行乎。况京官望俸。如大旱望雨。品大者無俸。尚可。品小者無俸。最難。臣同官張冲翼。曾經題請。部議不行。今奉上諭。各部酌改條例。竝當改正。或均以四季支領。或各從舊例支領。所關於國體者不小矣。我皇上寬仁厚德。憫念諸臣。養廉爲重。伏乞敕下該部。議覆施行。爲此具本。謹題請旨。奉旨。該部議奏。

又

內陞正四品頂帶食俸仍留管貴州道監察御史臣魏象樞謹題。爲請頒禮制之書。以昭國法。以端教化。事。臣惟教化爲朝廷之先務。禮制爲教化之大端。必昭代之禮制。彙有成書。斯朝廷之教化。行於天下。我皇上稽古右文。制禮作樂。紀綱法度。次第修明。獨有禮制之書。尙未頒布。未免爲國家三十年來之缺事。夫禮者。所以辨上下。定民志也。卿士大夫。頗重名義。軍民人等。惟守科條。如房屋。輿馬。衣服。器具。婚娶。死喪。祭葬。宴飲之類。各有禮制。各有禁約。凡部臣之題請。與言官之條陳。或經議覆。或經會議。事事奉旨。何嘗不曰遵行在案。通行曉諭乎。然而該部除在內行八旗五城外。在外不過行之督撫。督撫行之布政。布政行之道府州縣。止有告示一張。掛於署門。遵依一紙。報於上司。州縣奉行之事畢矣。原非家諭而戶曉也。未幾而告示損壞。卷案殘缺。官員遷謫。父老凋謝。三十年中之禁約。後生子弟。誰能記憶爲何事。有厭常喜新而干禁者。亦有愚昧無知而犯法者。貴賤尊卑之等差。動輒紊亂。淫巧詐僞之行。逕日見萌生。卽直省官員之衙署執事。猶有僭越。而况紳士軍民房屋輿馬衣服器具之過分。婚娶死喪祭葬宴飲之妄費。尙能家嫻禮制。人遵禁約乎。此朝廷之教化。雖行於天下。而未嘗實行於天下也。何也。有文告而無成書故也。臣請敕下禮部。詳查漢唐宋元所頒禮書。及朱子家禮。竝故明初年禮儀定式。稽古定制。禮制集要。教民榜文等書。何書簡要。略做體裁。爲崇儉去奢移風易俗之準。品官與士庶。務辨等威。吉禮與凶禮。各分門類。將屢年題定奉旨。一切禮制禁約。集成一書。先呈睿鑒。鏤板頒行。竝許坊間重刻廣布。俾通都大邑。無不見聞。窮鄉下里。盡知遵守。凡有故違者。治以法。數年之間。道德一而風俗同。文告之繁。條議之

多俱可省矣。按周禮大司徒以五禮防萬民之僞而教之中。孔子云。道之以德。齊之以禮。有恥且格。此之謂也。方今纂修會典。屬奉嚴綸。則煌煌禮制。不先著之爲集。何以會之爲典乎。禮臣典禮而外。教化爲重。我皇上宵旰圖治之至意。亟當仰體之矣。如果臣言不謬。伏乞睿鑒施行。爲此具本。謹題請旨。奉旨。該部確議具奏。

又

內陞正四品頂帶食俸。仍留管貴州道監察御史臣魏象樞謹題。爲考滿正在會議。謹陳愚見。請酌良法。事頃者考滿一事。吏部覆憲臣耿效忠一疏。奉有九卿科道會議具奏之旨。臣未經掌道。不與會議。但聞諸臣所議。京官應行考滿。外官三年有大計。二年有舉劾。又行考滿。恐滋多事。蓋因前次考滿之法。奉行不善。臺臣季振宜曾有斷宜停止之請。停止誠是也。會議諸臣慮及於此。懲前毖後。不議外官考滿。洵爲確然不易之說矣。但臣靜夜思維。京官每一衙門所屬俱係滿漢。辦事尙議考滿。激勵榮及所生。若在外州縣等官。事務專責一人。錢糧責以催徵。盜賊責以緝拏。逃人責以稽察。鹽引責以疏銷。驛馬責以供應。夫柳責以解運。荒蕪責以開墾。教化責以舉行。詞訟責以審理。城垣倉獄責以修葺。此皆有司當考之績。不爲不重。而且北直之盜賊叢生。江南之錢糧逋欠。與夫大略之逃人。疲地之鹽引。衝途之驛馬。近河之夫柳。種種繁難。事事勞瘁。厥職更爲難稱。亦不在部院所屬京官下也。果有歷俸三年稱職無過者。真可謂沙裏淘金。十無一二。此卽予以恩典。鼓其勤勞。亦不爲過。况均係朝廷之臣子。誰無生身之父母。在任

三年六年必待內陞方得考滿京職之缺有限行取之事難期父母叨榮未卜何日忽而一起盜案一名逃人非革則降其於父母生成教養之報已無望矣此則有司之苦筆難盡述者也今與京官一體考滿既不可行如別求一法足以加鼓勵而被寵榮又不可得臣思皇上之法如雷霆之無不震皇上之恩如雨露之無不霑合無於三年大計之中卽寓三年考滿之法按計冊內每開一官府道布按督撫俱填考語其有無過犯各列事實其歷俸薦次各開年月似與考滿之冊無異也若部院據冊考察如歷俸三年特舉卓異及實俸三年以上稱職無過者通行查出題作考滿應給恩典卽准給與內有平常應留者許其自新俟下次大計定奪其餘仍照八法處分儻有督撫等官開造不實賢否顛倒者部院題叅重處將見皇上之雷霆雨露兼舉併行內外一視在會議諸臣謂多一事不若省一事之爲愈臣愚謂行於內不行於外之非均此亦庶幾省事而均平之一法也如果臣言可採伏乞睿鑒敕下議覆施行爲此具本謹題請旨奉旨已有旨了該部知道吏部等衙門一本復考滿之法事本日奉旨魏象樞所奏著一併再議具奏

又

都察院左僉都御史臣魏象樞謹題爲秦地窮苦堪憐食鹽宜從民便以免擾民累民事臣惟治國以安民爲本安民以不擾民不累民爲先此皇上之盛心臣仰體久矣頃者辦事衙門見河東巡鹽御史何元英具有臣屬鳳翔一府有課無鹽之弊等事一疏已經具題投臣衙門揭帖內云陝西鳳翔一府額課徵

辦於本府州彙解運司。而食鹽竟無歸著。查據舊案。檄府行查。該府回詳內云。於萬歷四十年間。有將鳳屬原食解鹽改食靈鹽一議。其實小民便於私食靈鹽。因而願賠國課。究竟竝未有靈池挖井撈鹽。與商販買之事等語。又云。康熙七年。始遵上行招商往運。方知靈鹽原無實事。但既招商運。勢不得不嚴責本商。勉完引課。竝官爲揭借賠墊。以副考成。然鹽無實際。屢經詳請前鹽院。數年以來。歷經批發各司道暨兩運廳各議。迄今補救無術。若欲經久可行。無如招商於解池領引辦課。掣運晉鹽。爲今日確然不易之長策等語。臣閱此詳文。竊恐此策欲救弊而反以滋累。不若順從民便之爲愈也。何也。秦省去邊不遠。鹵地最多。其所產之鹽。乃天地自然之利。王政因之而利民者也。鳳翔一府。晉鹽既未嘗行。靈鹽又未嘗販。自願徵解額課。安然視以爲常。必無此理。如果無鹽可食。自故明萬歷四十年以至今日。府屬地方。豈盡茹淡之人。府屬有司。豈盡賠銀之官。亦必無此理也。或本地產鹽。家給人足。或鄰地賣鹽。鹽低價廉。俱未可知。臣雖未悉鳳翔情事。姑以臣鄉鄰近之東城西城等處類推之。邊地窮民。久食土鹽。認納鍋課。三百年矣。近因蘆商不念地方貧苦。告行蘆鹽百有餘引。以致禁刮土鹽。其間不耕不毛之鹵地。賠納錢糧者有之。棄天地自然之利。而令其食極貴之鹽。小男幼女。攤銀買鹽。皆算一丁。苦累實甚。此臣之所知者也。臣又聞永平府亦然。此等地方。悉宜照萬歷年間。各食土鹽。培養百姓。今鳳翔若復招商掣運晉鹽。勢必力禁久食之鹽。而勒買新運之鹽。擾民累民。不止一端。不止一地。大非我皇上愛養百姓之盛心也。況我朝賦役。俱照萬歷年間酌定。茲鳳翔食鹽。既從萬歷年間相沿成例。民不謂苦。其享天地自然之利。卽受

國家不費之惠可知矣。且鳳翔一府屬在北方。止宜憐其窮而從其便。不但省上下行查之紛擾。兼可免秦晉掣連之驚疑。如慮其有課無鹽。恐致苦民。則係萬歷年間之例。不至今日而始也。有應徵應解之課。盡歸於公。卽食鄰地本地之鹽。均不爲私。若旣無鹽而又賠課。果有大不便於民者何在。應聽民自行具告之日。再爲題請酌議。此時與民休息。多一事不若省一事。願我皇上深思之也。如果臣言不謬。伏乞俯賜採擇。字數逾額。併乞睿鑒施行。爲此具本。謹題請旨。奉旨。該部議奏。

又

順天府府尹臣魏象樞謹題。爲欽奉上諭事。臣接吏部劄付。內開康熙十三年三月二十日。奉上諭。因大兵進剿逆賊。指日蕩平。地方恢復。需人甚急。著臣等虛公舉薦。劄行到臣。臣雖愚昧。不能知人。然舉爾所知。素所自矢也。敢不欽遵保舉。仰副皇上廣攬人才。撫綏民生至意。臣惟國家得人致治。人臣以人事君。莫重於保舉。一人不能得一人之用。則是上以實求而下以名應。非臣誼之所敢出也。據臣平日所知者。首得一人。特爲我皇上陳之。郝浴。直隸定州人。由進士原任御史。今流徙盛京地方。前巡按四川時。值劉文秀賊勢猖獗。吳三桂逗留不進。浴曾有封疆大計等疏。三桂叅其悖詞罔上。會議奉旨流徙。夫以書生而言戰功。誠爲有罪。若以按臣而失城池。豈盡無罪乎。浴原疏內。有一晝夜七次移會。迫之以不死於賊。必死於法之語。雖彼時過於激切。亦職分之當然耳。迨賊滅民安以後。浴不能退讓自居。三桂所以深恨。必欲殺浴而甘心也。今浴之孤忠耿耿。祇有悔過於遐遼。無由圖報於朝廷。如浴之才之守之學之識。臣

皆愧不及。臣卽讓職。亦所心願。臣考古來人才。拔之罪廢之中。發其鬱憤之氣者。用之而無不效。况浴之骨鯁血性。尤爲過人。國家用才。必用此等。乃有實濟。使其蚤在西蜀。操尺寸之權。豈肯如羅森輩之俛首從逆。而竟不知忠義爲何物也哉。臣旣惜蜀之陷於賊。而轉惜浴之錮於遼也。近見吏部覆科臣劉沛先人才棄置可惜一疏。內稱郝浴竝無冤枉。議固有據。似止就處浴之案議之。尙未就叅浴之人議之也。夫臣子立朝。各有本末。卽得罪。亦各有本末。當日叅浴者三桂也。使三桂忠於我朝。始終恭順。方在託以腹心。盟茲帶礪。浴不過一書生耳。若非特恩賜環。浴卽老死徙所。誰復過而問之。今三桂叛逆不道。天下無一人不恨三桂。自無一人不憐浴。浴按臣也。當三桂身居王爵。手握兵柄之時。因從封疆起見。不附其勢。不畏其威。致三桂成不共戴天之仇。三桂之所仇。正爲國家今日之所取。何忍終棄之。卽浴果奪三桂之功。爲己功。將浴流徙二十年。亦足以蔽其辜矣。且浴服罪以來。頂帶君恩。甘貧讀古。想其英年盛氣。消磨殆盡。從此小用小效。大用大效。臣敢以身爲保。浴必不負臣。豈敢負皇上。臣仰見我皇上廣如天之度。宏使過之仁。惟才是求。不拘資格。臣曷敢因吏部已經議覆。知而不舉。失此真才。伏乞皇上電覽郝浴再報封疆大計。三報封疆大計。緩策西南一議。急策西南一議。竝大兵廓地無期。微臣濫賞。非分諸疏。以觀其經濟。請敕部暫取郝浴引見。以察其才品。如果堪以效用。然後用之。臣再得一人。魏允升。北直宣府進士。原任江南常熟縣知縣。因入糧道公署。面講運軍兌糧之弊。該道怒其佩刀揭叅。今革職。臣知其體貌魁梧。才華卓越。其淡泊之學術。勇往之擔當。更有可觀。經緯兼長。猷爲必著。有用之器也。至於允升與臣隔

省非係一家。亦無世俗聯宗之事。理合一併聲明。疏內敘述緣由。字數逾格。統乞睿鑒俯宥。敕部議覆施行。爲此具本。謹題請旨。奉旨。該部議奏。

又

戶部左侍郎臣魏象樞謹題。爲遵旨保舉事。本年八月內。吏部會覆御史朱尙義條陳一疏。內有三品以上堂官。將素所灼知深信漢軍漢人。虛公保舉等語。奉有依議之旨。臣竊思時值多事。封疆財賦。俱關重大。各地方需才甚殷。我皇上求賢若渴。蓋不止軍前候用之人。宜蚤計也。今軍前候用之人。不爲不多矣。臣謹爲至切至要之地。舉一人焉。如候任福建布政使李士楨。旗下貢士。其人操守清介。才品優長。臣雖僅識一面。然灼知而深信之久矣。憶順治年間。臣同鄉同年張璫。以御史巡視兩淮鹽課。其清正爲世祖章皇帝所知。及差滿回京。臣敬服其人。因問屬下吏孰賢。璫曰。有守有爲。惟李士楨一人耳。臣心重之。此臣以信璫者信士楨也。閱數年。士楨補授臣鄉大同巡道。在任之時。與陞任之後。父老子弟。頌清廉愛民者。如出一口。此臣又以信百姓者信士楨也。又訪士楨前爲安慶太守。後爲河南臬司。每詢彼地之鄉紳及僚友會官。茲士者。咸稱士楨賢。此臣復以信鄉紳友者信士楨。垂二十年。未嘗稍變也。方今閩省未開。士楨暫留在浙。無任可到。浙江藩司已經陞任。不可一日無官。且不可一日無好官。何也。江浙俱爲財賦重地。又值軍興。旁午之時。錢糧出入。稽核匪輕。徵輸緩急。籌畫不易。得一廉明藩司。而民膏兵餉。均與國計有裨。尤爲浙省攸賴。俟閩省恢復。另行推補。浙省得士楨。或可與江南之得慕天顏等也。若從遠地陞

補雖有候補之法若真亦稱賢能而臣不敢舉恐不能星速赴任克濟急需士楨朝聞命而夕受事可稱人地相宜矣頃者奉旨會推士楨既係候任之官例不開名臣區區愚悃據實保舉合無將士楨聽九卿科道會推應否可用恭請皇上鑒裁如臣知人不明所舉未當臣罪自不敢辭也伏乞敕下速議施行爲此具本謹題請旨奉旨知道了該部知道

又

戶部左侍郎臣魏象樞謹題爲再保要地堪用之人才以破常格以收實效事竊惟逆賊煽亂引誘愚民民生不安賊燄日熾或因撫綏未善下情不能上達則脇而去之者多矣臣嘗鯁鯁慮之如近賊地方苟能加意撫綏潛消反側培我國家元氣此非深得民情之人未易勝任也邇來保舉一法奉旨允行然時事多艱眞才難得誰肯輕於嘗試自取罪戾哉但臣以一念之愚忠妄籌目前之急著若保一人而果能有益於百姓臣一身之利害不暇計也謹將素有才品要地堪用之人再爲我皇上陳之一爲郝洛直隸進士前任御史巡按四川時因吳三桂叅伊冒功流徙盛京地方臣查洛移會報捷辭爵諸疏明係不附三桂故三桂恨之後因閣臣合詞薦洛才堪任用觸怒三桂摘其疏中字句激切牴奏必欲殺洛爲快觀今日據地操戈之變大負國恩則洛當日之情罪已在聖鑒中矣去年科臣劉沛先薦洛按蜀時操守才幹卓然可觀至今蜀民念茲不置洛年力正強棄擲可憫等語續奉上諭保舉人才兵部尙書王熙保洛果敢任事精白一心雖以言事獲罪臣以爲用當其才何論罪廢儻蒙皇上破格召還授以方面之任俾

得展其才略。效用邊疆。彼必感而思奮。潔身竭力等語。臣保洛才守學識。皆愧不及。卽讓職亦所心願。三桂之所仇。正爲國家今日之所取。何忍終棄之等語。俱未蒙俞允。夫以閣臣。部臣。科臣。前後保薦。無非爲朝廷惜。此有用之才耳。近在臣部。見我皇上鴻恩浩蕩。免魚皮地方犯罪之人。令其效用。乃將洛終身禁錮。不獲邀皇上使過之仁。深可憫惜。臣之所以一保再保也。昔卞和抱玉。三刖其足而終獻之。臣遭逢盛世。又何忌諱哉。一爲王天鑑。宣府人。與臣同科進士。初任縣令。歷陞慶陽道。告病在籍。已十餘年。長才偉抱。操守清嚴。膽識尤稱過人。當其未病之先。有上馬殺賊下馬治民之略。告病以後。閉戶調攝。淡泊甯靜。鄉里重之。今病或漸愈。若出而任事。尙可有爲也。一爲鄭端。直隸進士。歷陞貴州學道。服滿現在陝西候補。素履醇謹。歷任著聲。且孝友信義之人。立朝忠愛可卜也。雖由庶常起家。饒有終軍壯志。前兵部尙書王熙保其實心守法。大有執持。潔己持廉。克盡職掌。年力精強。才猷練達。若授以旬宣之任。俾效力恢復地方。必能相機度務。整頓綏輯。大有裨益等語。懿德之好。良有同然矣。以上三員。均係有用之才。據臣愚悃。再行保奏。其堪用與否。自有睿鑒。而非臣之所敢必也。如官不當設。人不當保。臣罪何辭哉。伏乞皇上省覽全疏。併乞敕部一併議覆施行。爲此具本。謹題請旨。奉旨。該部議奏。

又

戶部左侍郎臣魏象樞謹題。爲籌餉之一。在確估價值事。臣查康熙十年八月內。因直隸各省米豆草束等項價值。督撫身居地方。其價值貴賤。無不知之。該督撫照時價確估。據實報部。卽行開銷。不必駁回等

因九卿科道會議具題奉旨依議欽遵在案。彼時承平之際。不過買補水旱災傷之缺額。爲數無多。目滇閩告變。王師征勦。兵餉緊急。供應浩繁。大兵經過地方。及駐防省分。辦買米豆草束。每歲費銀數萬。或至數十餘萬兩不止。但查近日報銷。各省有大兵屯駐之地。採買豆石。每石價銀。止開八錢。其直隸河南山東江南等省。係產米豆之地。報到粟米料豆等項價值。亦開八錢或九錢。至一兩以上不等。且又有將篩颺折耗盤剝運費腳價等項。一併開報。臣部以定例內本省起解錢糧。不准支給腳價。行令該督撫將篩颺折耗盤剝運費等項扣除。今兵餉供應浩繁。正當節省錢糧之際。臣部堂司各官。再三商榷。若臣部逐案核減。則各處價值。貴賤不一。減多減少。止憑臆揣。不便卽以侵冒之數駁叅。况已經九卿科道議定。不必駁回。遵行已久。若據督撫開報。概行准銷。恐有不肖官員。藉此不必駁回之例。以賤作貴。造冊報銷。督撫未必預訪時價。不過據冊略減。卽行報部。侵蝕浮冒。易滋弊端。此等價值。每案稍一節省。則數十萬可得。非些須可比。據臣一偏之見。今歲直省地方。處處豐稔。價值賤於從前一倍。此可以節省之時。我皇上特頒上諭。令各督撫實心體國。勿得任憑下官開報價值。浮冒錢糧。務期節省。以濟軍需。若非天語蚤行。嚴飭。雖臣部終年之持籌。不足當督撫終年之冒銷矣。如果臣言不謬。伏乞睿鑒。省覽全疏施行。爲此具本。謹題請旨。奉旨。該部確議具奏。

又

戶部左侍郎臣魏象樞謹題。爲籌餉之二。在嚴覈關課事。竊照關稅一項。每年臣部額銀六十萬兩有奇。

軍餉賴之。先因各省正在用兵需餉之時。將康熙三十四兩年解部稅銀。并停辦一半銅銀。行令解交各該藩司。竝直隸守道。充濟軍需。康熙十三年出差各官。止報收銀二十萬兩有奇。缺額至四十萬兩有奇。足額者僅四處而已。其安靜地方。與近賊過兵地方。俱稱吳耿二逆叛亂。王師進剿。大兵往來。以致商船稀少。關稅缺額。情由疊次呈報。復據有該督撫具題到部者。臣部恐有稅銀已得。借端侵欺。無處稽考。不得不請敕該督撫再行嚴查其缺額。官員雖有考核之則例。而所缺銀兩。惟據督撫之訪詢。此亦無可如何者也。但今十四年分。各關官員出差地方。俱已漸次寧謐。進剿兵馬往來稀少。商賈船貨已無壅阻。關稅自當照常足額。乃紛紛又報缺額矣。儻有不肖官員。踵習故智。藉口商稀課缺。將錢糧侵蝕。及至考成之際。課額已缺。軍需已悞。雖嚴加處分。亦何濟乎。臣與同堂滿漢官。再三商榷。因則例已定。別無良法。但臣有一偏之見。或可少行一時之權。以足六十餘萬之額。亦未可知也。請自今以後。凡各官到差。每一季將所收稅銀數目。報督撫一次。如一季足額。不必具題。如一季缺額。即行具題。將本官立行撤回。照才力不及處分。另差賢能。速去徵收。如有藉口地方荒亂。商阻課詘。有虧稅額。或奸詐之徒。指稱王公將軍官弁船隻。希圖漏稅。題叅重處。如別有發覺。將督撫以徇庇悞餉論。一併處分。果能潔己恤商。稅額全完者。請照地方官地丁錢糧額徵全完之例議敘。以示鼓勵。此臣之偏見也。臣同官皆以軍餉爲急。識見遠大。更有何法可得賢能之人。以爲日後國課之計。伏乞皇上省覽全疏。敕下臣部。一併確議速行。庶關課不致缺額。軍需亦有攸賴矣。謹題請旨。奉旨。該部議奏。

又

戶部左侍郎臣魏象樞謹題。爲籌餉之三。在慎用藩司事。臣聞自古用人理財。相爲表裏。而藩司一官。爲一省錢穀之總匯。又與臣部相爲表裏。誠不可不慎用也。故昔日之藩司。僅司本省之出入起存。猶需本官之精明才幹。在今用兵地方。錢糧浩繁。有本省徵解。有別省協解。有臣部發解。動至數百萬兩。任其綜理。聽其支銷。頭緒紛紜。款項錯雜。若稽核一處不到。計算一處不周。登記一處不清。給發一處不當。則弊孔百出矣。此猶就其職掌言之也。設使操守不潔。情面不破。聽信衙役。彌縫上官。更難勝任。在衙役誘之。則曰此項可用。彼項可還。在上官取之。則曰支用由汝。開銷由我。甚而逢迎過往。泛應抽豐。一切資斧鞍馬。或輕或重之類。苟無所出。勢必取給於庫中。而昧者受之。猶謂藩司採取囊中物也。久之而欺蒙牽瀾。不惟朝廷之金錢不能節省。卽有節省。未必肯爲朝廷用矣。我皇上不見在外如江南藩司。錢糧遞年那混一案。至二百萬之多乎。不見湖廣藩司。征勦西山蒙瀾一案。至十萬之多乎。在內如工部司庫。盜銀至十三萬之多乎。覆轍在前。賢者弗蹈。亦顧所用何如耳。頃見江西布政司缺出。正皇上擇人推用之際。十分宜慎。况十三年至今。撥解錢糧。竝本省錢糧。俱未奏銷。旣與臺臣徐旭齡條奏撥解一次報銷一次之例不合。又與該督董衛國所請年終截至報銷之疏亦不合。今再易一手。須得賢能之官。以清從前之案。不然。年復一年。欲其錢糧清楚。不可得矣。至於湖廣一省。兵馬最多。錢糧亦最多。部院兩大臣撤回之後。非得冰心鐵面。敏練精詳之藩司。萬萬不可。今現任之官。是否能勝其任。惟皇上密察之。臣謬佐司農。總

總過計。竊思日講生財。不如日講節用。卽講生節而用非其人。祇漏卮耳。臣所謂籌餉在慎用藩司者。此也。抑臣又有言者。一省之錢糧。掌之者藩司也。察之者巡撫也。近日多以本省之藩司。陞本省之巡撫。設或錢糧不明。斷不肯自行發覺。而新任藩司。又不得不曲爲遮蓋。其於錢糧互相覺察之意。謂何。嗣後更宜慎之矣。臣愚瞽之見。伏乞睿鑒。俯賜採擇施行。爲此具本。謹題請旨。奉旨。該部確議具奏。

又

戶部左侍郎加一級臣魏象樞謹題。爲欽奉上諭事。臣伏觀我皇上聰明天縱。典學日新。講論經史之源流。考究古今之得失。旣孜孜不遑遐逸。乃於萬幾之餘。旁及文翰。思得奇才碩彥。學問淵通。文藻瑰麗之士。以備顧問著作之選。奉有上諭。著在內三品以上及科道官員。各舉所知。洵與古帝王崇儒重道。千載同符矣。竊念博學鴻儒。世不多見。臣鄙陋失學。安能知人。且有一二素知。旣經諸臣具疏奉旨者。臣又不敢再爲贅舉。謹就聞見所及者。得五人焉。一爲原任湖廣布政使告病畢振姬。山西高平縣進士。清操自苦。才略過人。博古通今。有體有用。請告十餘年。躬耕百畝。猶讀古不輟。而經史之貫通。詩文之古奧。所稱良史才。庶幾不愧。雖年過六旬。體質稍弱。尚可備著作之選。一爲原任江西嶺北道參政告病湯斌。河南睢州進士。恂恂儒雅。清謹可風。謝病歸田。閉戶讀書。學有淵源。躬行實踐。文詞尙實。去浮。一爲見任戶部江西司員外郎馮雲驤。山西代州進士。居家孝友。辦事勤敏。素以古學自勸。兼能留心風雅。常退然抑損。不敢自居。一爲見任大理寺評事白夢鼎。江南江甯府進士。才識老成。學問博雅。蕭然四壁。惟以詩文自

娛一爲原任浙江督糧道參政告病王紫綬河南祥符縣進士宏才積學兼工詩賦有倚馬之才終養在籍讀書二十年起補江西贛南道保守贛城尤覘經濟陞任浙江未久告病如痊可試所長以上五人雖未敢遽謂可追前哲仰副皇上稽古典學之至意亦不敢不竭愚昧之見少盡以人事君之微誠如果臣言不謬伏乞睿鑒採擇施行爲此具本謹題請旨奉旨吏部議奏

寒松堂集卷四

奏疏 都察院

都察院左都御史臣魏象樞謹題。爲申明憲綱。恭請嚴飭。以清致治本源事。臣才庸年老。歷任愧無寸長。復叨總憲之命。顧名思義。惶悚益深。敢不申明憲綱。期與諸臣共圖報稱。竊念國家之根本在百姓。百姓之安危在督撫。故督撫廉則物阜民安。督撫貪則民窮財盡。此固宸衷之所洞鑒。部院科道諸臣。皆歷歷言之。卽督撫諸臣。亦非盡不自知也。獨不思封疆大吏。拔諸羣僚。簡在帝心。委以事權。寵以爵祿。自當潔己奉公。察吏安民。以報朝廷恩遇。乃往往未陞督撫。才能尙有可觀。一經簡用。操守頓爲改節。受恩愈深。負恩愈大。清夜自返。於心何安。我皇上宵衣旰食。尙不忍以需餉之殷。加派百姓。爲督撫者。亦何忍因肥家之故。縱貪殃民。以屬官之奇貪。爲一己之奇貨耶。雖一時著績封疆。撫綏兵民。糾參大貪大酷。克盡厥職者。亦有其人。然而不可多見矣。臣願諸臣爲百姓留膏血。爲國家培元氣。臣不敢不爲朝廷正綱紀。爲臣子勵名節。風紀所在。臣之職也。恭請嚴飭而申明之。一各府州縣等官。不許謁見督撫布按。此風在世祖章皇帝時。屢加嚴禁。未敢公行。今且日甚一日。以謁見爲定例。屬官到任。未嘗挾資而來。勢必挪撮借貸。竭力逢迎。冀得歡心。日後剝民補償。貽害無窮。所當申飭者一也。一督撫不許差內使人等。借訪事爲

名往各府州縣所差之人一到地方口中賢否較督撫親臨懼怕更甚暗地供奉流弊難言所當申飭者二也一各府州縣等官擅離地方赴省拜壽夤緣通賄弊竇多端至督撫每次加級更宜感恩圖報若令屬官每次餽銀行賀兼以金屏錦帳等物屬官何出惟有剝民所當申飭者三也一督撫布按不許自開便門令所屬官役人等出入傳事並內使人等早晚來往不但風憲失體抑且諸弊易生以致道府州縣等官漸廢關防所當申飭者四也一督撫布按不許將遊客星卜及優伶人等或留住省城或轉送各府州縣作與抽豐動挾上官威勢擾害地方在京官員亦不許貽書薦送所當申飭者五也一督撫布按凡所應造冊籍投送各衙門不許收取費用陋規借稱部費縱容屬官科斂苦累民間所當申飭者六也一督撫所屬學道考試生童關係文教宜嚴行查訪凡有不公立行題參不許受其餽獻縱容賄賣生童溢額私取漫無糾參科歲事畢宜嚴加考核分別優劣報部以彰公道所當申飭者七也一督撫布按稽察州縣凡召買米豆草束及委官修造兵械製辦火藥礮鉛船隻等項不許捏報價值代爲開銷不許將民間所辦米糧物料措不給價一切應追應賠銀兩不許分毫無完代請豁免官養驛馬不許擅發里民喂養行戶貨物過關收稅萬苦千辛不許官價取用此皆督撫徇庇縱容以致有司肆行無忌所當申飭者八也一私派補庫及變賣倉糧督撫不許徇庇有司衛所等官任意灑派取之無名亦不許借稱錢糧准算部民子女轉送人情所當申飭者九也一府州縣等官離任凡有花費庫銀收解不明指稱民欠及衙蠹侵肥錢糧無著該督撫不許勒囑新官交代以致錢糧愈久愈淆後雖發覺追補多不能完總以家產

盡絕結案。錢糧付之烏有。所當申飭者十也。以上十款。皆係督撫應行事宜。關係吏治民生者。自今嚴飭以後。闕茸者力圖振作。貪汙者洗滌肺腸。若有因循陋規。臣之白簡無私。訪查有據者。立行糾參。卽事屬風聞。亦不敢不指陳入告。請旨密察。庶幾大法小廉。風清弊絕。以成端本澄源之治矣。緣係條奏憲綱。字數逾額。如果臣言不謬。伏乞睿鑒。採擇施行。爲此具本。謹題請旨。康熙十七年八月二十三日題。二十八日奉旨。這所奏事情。切中時弊。該部院會同詳議具奏。

又

都察院左都御史臣魏象樞謹題。爲吏治漸壞。公道宜彰。據事直陳。以警將來事。竊惟進退賞罰。國家之大權。是非可否。天下之公論。進一人賞一人。而天下知勸。退一人罰一人。而天下知懲。蓋有合乎天下之公。是公非。共可共否也。故孔子曰。舉直錯諸枉。則民服。舉枉錯諸直。則民不服。洵不誣矣。我皇上用人致治。以大公至正之道出之。滿漢內外。惟取賢良。而督撫大臣。受皇上之恩。自當體皇上之心。爲心廉介者。宜舉而不宜黜。溺職者宜黜而不宜舉。貪酷害民者。宜揭參而不宜徇隱。臣略指一二事。所當嚴飭。以警將來者。爲我皇上陳之。如原任江南嘉定縣知縣陸隴其者。廉介之官也。知縣任內。清操飲冰。愛民如子。賢聲傳播於都下。臣心竊重之。謂異日可步于成龍之後塵者。此人也。乃未幾而該撫疏稱。隴其守絕一塵。才非四應。德有餘而才不足。部議降調。又有被盜一案。該督疏隴其據汪標首告仇殺。審明仇殺無據。請緝結案。獲盜過半。原無諱飾。與武官竟不報聞者迥別。止以開報職名遲延。部議革職。例之所在。臣俱

不暇問。但縣令中有此廉介愛民之官。正當爲羣僚作榜樣。爲百姓作慈母。今之有司。惟守與德爲難耳。既知其守與德矣。何不卽留之以長養百姓。雖該撫再疏。奏稱隴其委係冰操不染一塵。勵其素守策效將來。部復不允。終以例拘。萬民怨恫。爲之罷市。去之日攀轅號哭。執香遮道。去之後家家尸祝。比於父母。乃行李一介而蕭然歸去矣。又如原任江南鎮江府知府劉鼎者。溺職之官也。知府任內全無才能。參罰至五十案。其停陞及戴罪督催者三十餘案。降俸者四十餘級。應追銀兩無完者二萬三千兩有奇。應追米麥無完者五千九百石有奇。此一官者。溺職已極。乃報陞蘇松糧道。該督撫從何見其才能。一旦盡銷參罰停陞之案。而脫然陞去矣。又如原任絳州知州曹廷俞者。貪酷之官也。知州任內貪如虎狼。敲骨吸髓。捐納員外。因而酷以濟貪。聽信衙蠹撥置。將富民之妻王氏指稱私鹽名色。鎖禁署前神廟。嚇詐銀兩。縱役淫汙。氏不允從。羞憤自縊。閩州士民告伊貪縱惡蹟。平陽知府李廷梅匿不揭報。反令本府廳官親身赴州。以講和爲名。將廷俞擁護出境。以致士民不敢具告。現今公憤冤詞。豎碑於州。此一官者。貪惡至極。竟不報巡撫糾參。而飄然颺去矣。夫朝廷所以鼓勵人才。澄清吏治者。惟在賞善罰惡。進賢退不肖耳。况當公道昭明之日。乃將廉官與貪官參處同例。盡職與溺職保薦無分。豈我皇上勵精圖治。激濁揚清之盛心哉。若不嚴加申飭。則前者不戒。後者不警。下官可以欺上官。上官可以欺皇上。上下相蒙。使廉吏灰心。貪風日長。臣竊鯁鯁慮之也。伏乞嚴飭各督撫。大破積習。躬先率下。表正則影直。源清則流潔。薦舉必首廉介。參劾必協輿情。於以肅官方而勵人心。民命庶其有瘳乎。緣係指陳事蹟。字數逾額。如果臣言

不謬。伏乞睿鑒。採擇施行。爲此具本。謹題請旨。康熙十七年八月二十三日題。二十八日奉旨。這本內事情。該部嚴察議奏。

又

都察院左都御史臣魏象樞謹題。爲科場弊竇多端。請嚴關防之法。以重大典事。竊惟國家至公者。莫如科目。而最要者。莫如考官。必上體朝廷顧俊之心。下鼓士子讀書之氣。選舉嚴而名器重。乃可以收人才之效也。今科主考官員。蒙皇上引見之後。不論次序。重以欽點。示以不測。各省榜發。頗無訛議。但臣與侍郎孫光祀。學士陳廷敬。奉旨磨勘順天試卷。荒謬疵蒙不一而足。已照例參處訖。臣愚竊謂既懲其前。當懲其後。從來科場之弊。不止一端。其賄賂詭秘關節巧妙之處。雖未易窺。乃有人人知之。人人恨之。而第嘆息於無可如何者。祇因內簾深邃。乃耳目不及之地。主考同考。果皆清白乃心。敬慎從事。夫復何慮。儻有不肖之輩。蒙面喪心。通同作弊。斷斷不肯互糾。間有一人舉發。衆人又互相解釋。並無別官在內。可以查糾者。雖至公堂有監試御史。專查冒籍。頂替。換卷。亂號。傳遞。代筆。及彌封。謄錄。對讀。一切試卷錯失等事。參疏疊疊。其與內簾重門封鎖。從無糾參在內之弊。臣任御史時。曾監試二次。備知之矣。臣思事關大典。不厭詳慎。請自今以後。順天內簾。宜照內外監試一體添差滿漢御史。不與文事。應在聚奎堂向上設座。會經堂左右歇宿。所當查糾者八款。請爲我皇上陳之。一曰場外賣題。入場擬題一二道。假作掣籤。此一弊也。今後凡擬題之夜。四書掣定幾章。每題每人各擬一道。五經掣定幾章。每題每人各擬十道。俱送

主考官畢。寫籤入筒。御史手掣。以杜預洩之弊。二曰同考官主考交頭接耳。暗通私言。揣摩其卷係某人。係某名士。此一弊也。今後凡入闈之後。各房隔別。不許私訪聚談。如擬題閱卷時。所言公。公言之。俱不許至主考座前。啾啾耳語。亦不許彼此越桌私窺。其薦卷放於中間案上。御史驗明內無私通小帖。方送主考收閱。以杜暗通之弊。三曰退食晚宿。私相密語。及攜卷入房。藉口商訂。暗查關節。此一弊也。今後每日公堂所閱硃卷。天晚之時。當面查入各箱。御史與主考共加封鎖。次日公同開閱。以杜私查之弊。四曰同考官薦卷。因有私人。暗通主考。姑容取中。雖有佳卷。再不呈薦。致屈真才。此一弊也。今後凡有佳卷。盡數呈薦。或取或擯。主考箱內封存。不許同考官私看。每人薦卷若干。御史記數。如有託詞少薦。及將荒謬之卷妄薦者。非係不公。必係不明。御史一面題明主考。一面同衆搜閱。以杜埋沒之弊。五曰同考官將不應密點密圈之文。滿篇圈點。瀾呈主考。此一弊也。今後同考官薦卷。止用句圈句點。御史驗明。送主考詳閱。聽其圈點註批。放榜以後。再不許私改文卷。飾加批評。以杜欺蒙之弊。六曰暗帶主文相公。假妝僕役。跟入內簾。尋查關節。代點落卷。此一弊也。今後跟隨僕從。御史搜檢放入。主考各帶三人。同考官各帶二人。御史亦各帶二人。寫本筆帖式書役各一人。再不許一人出入。以杜夾帶之弊。七曰頭場三場俱有硃卷。二場反無硃卷。或三場未貼。而又無卷。埋藏偷換。悞人功名。此一弊也。今後御史嚴查根究。所騰之卷。匿在何處。一面歸入本號卷內。一面糾參。以杜隱害之弊。八曰不中落卷。何篇有疵。不將擲落緣由批出。或略加數點。或亂抹一筆。竟行擲去。此一弊也。今後落卷。於開榜之後。即發本生自看。如無批語。及妄抹佳文。阻抑真才。

者。許本生具呈原內簾御史。查明參究。以杜阻抑之弊。此八款固屬緊要。更有詭秘之事。惟在御史鐵面冰心。加意嚴查。有弊卽糾。臣衙門查其參疏。於二八月一體造冊。進呈御覽。如容隱不糾。日後別有發覺。一併重處。至於一切封門、發題、進卷、分卷、供給、關防諸事。責在御史。令主考專心閱卷。庶不致取中之文。不暇註批。二場三場之文。不暇周閱矣。臣之獨言順天者。何也。各省主考。率皆京卿部科等官。而同考不過州縣微員。易於彈壓。素非親暱。難以私通。惟順天主考。率皆編檢等官。而同考除知縣一二員。其餘率皆部屬中行評博進士也。或官則比肩。或情屬素交。卽有一二謹慎之人。難敵衆手障蔽之巧。且京師仕宦子弟。以及遊學就館之士。於應開考試之官。朝夕相近。題目易洩。關節易通。無怪乎人言嘖嘖。文章荒謬之多也。若再不立法嚴防。竊恐首善之地。大典不光。文運士風。因循漸壞。所關不小。至於會試主考。雖係大臣。而同考多員。心術不一。難保無私。必主考與御史共相關防。庶可釐弊。亦應照順天鄉闈一體行之。臣從科目起見。鰓鰓過計。如果稍裨場務。卽將臣疏刊刻滿漢字一冊。入場之日。交與監察御史。伏乞敕下禮部確議。務絕弊端。緣係列款。字數逾額。並乞睿鑒施行。爲此具本。謹題請旨。康熙十七年十二月初十日題。十五日奉旨。該部確議具奏。

又

都察院左都御史臣魏象樞謹題。爲再陳科場條例。以期實可遵行事。竊照賓興大典。糊名易書。父兄不能知。鬼神不能洩。乃天下第一公道事也。自丁酉年科場作弊。曾經科臣任克溥等糾參。蒙世祖章皇帝

赫然震怒。以嚴法處之。人心肅然。猶恐分閱有弊。改爲公閱公薦。謂一人尙可以行私。而衆人遂可以祛弊也。自定此例。不意名雖公而實私。欲祛弊而反多矣。臣敢悉言之。夫分房閱卷者。每官闔分硃卷若干。卽於卷面上打某經某房印子。親手註批。如所取有弊。或科道訪糾。或部科磨勘。卽將本房本官嚴加處分。百喙何辨。若所取者公。通國之人皆知之。且稱某房得人之盛矣。今有四人五人閱一經者。有三人二人閱一經者。其中人品心術。豈無賢不肖之分。儻遇處分。例無分別。賢者受冤。不肖者得意。非法之平也。如果係公閱公薦。卽目擊一字。手著一筆。均任其咎。亦自難辭。然而卷至數千。勢亦不能公閱。試問近科以來。鄉會主考同考等官。誰能一語欺人曰。原係公閱公薦者。儻曰公閱公薦也。臣以二事證之。如順天丁巳科監生劉承啓落卷批云。此卷余連薦三次。而究不得中者。非天意不中。而爲今科之人不中也。可惜可嘆。此必一人所批。而非三人公批者。如欲查其何人筆迹。是何情由。而莫可究詰也。祇以公閱之例。任其負屈耳。又如順天戊午科磨勘中式監生吳昇卷內。子夏言語。破稱聖人。應抹不抹。且加密圈。此必一人所圈。而非五人公圈者。如欲查其何人筆迹。是何意見。而亦莫可究詰也。祇以公閱之例。一概議處耳。由斯類推。公閱公薦之定例。旣爲藏垢納汙之妙法。又爲卸責分罪之美名。而非實實遵行者也。况卷面旣不印某房字樣。則同考主考等官。欲中私人。暗查關節。偷換試卷。其弊更大矣。臣再以二事證之。如順天戊午科同考官內閣中書張潤民。闈中自立誓詞。內云。存一私心。身首異處。死不還鄉。如有借卷換卷者。亦如之等語。其原非公閱公薦可知。現有刊刻誓詞可據。此乃預行嚴防。而幸免處分之明驗也。又

如順天戊午科同考官文安縣知縣魏建藩所閱不中式驚字五號北皿試卷被人偷去。暗加圈點。欲圖取中。建藩查出情弊。隨即呈明。乃不敢取中。且主考既令分閱。又行偷卷。其非公閱公薦可知。現有建藩印文。申報吏禮二部。續中臣衙門可據。此又曾經舉發。而難免處分者之明驗也。由斯類推。公閱公薦之定例。既爲玩法作弊之淵藪。必爲昧心取利之羶途。而非實實遵行者也。古語云。琴瑟不調。解而更張之。與其名公而暗分。不若分房註批之爲正。與其既分而同罪。不若按房參處之爲公。今後順天鄉試並會試。允臣前疏所請。添差內簾監試御史。先將更經分房之官。面同主考封籤手掣。再將謄入硃卷之數。面同主考圖分打印。如某房有弊。御史即將某官指名糾參。其同考一經者。不列銜名。不加批語。自不任處分之咎也。各省鄉試。責在主考。亦照順天之例行之。我皇上法度紀綱。務崇實效。豈有開科取士之大典。而虛懸功令者哉。抑臣更有請者。臣磨勘之時。見禮部條例。舉子處分甚當。考官處分反寬。故法輕人玩。閱文章率將荒謬疵蒙之文取中。非所以重大典也。臣聞水柔則易狎。火烈則難犯。以後考官處分。一視舉子所犯爲輕重。如舉子應斥革者。考官即應革職。舉子應罰停二科者。考官即應降調。舉子應罰停一科者。考官即應罰俸。則人重犯法。必實心閱文。矢公矢慎矣。我皇上天縱聰明。爲萬國右文之主。斟酌損益。務求無弊。作何垂法於萬世。作何示警於將來。伏乞睿裁。再請敕下禮部。會同吏部。確議定例。字數逾額。併乞鑒宥施行。爲此具本。謹題請旨。康熙十七年十二月初十日題。十五日奉旨。吏禮二部會同確議具奏。

又

都察院左都御史臣魏象樞謹題。爲農事根本所關。民食軍需並重。謹竭愚見。以安地方事。竊惟民爲邦本。食爲民天。此定論也。在今征討叛逆。士馬雲屯之際。民食足則軍需有濟。農事急則民食無憂。頻年以來。歲登大有。處處豐裕。斯處處飽騰。皆我皇上敬天愛民之誠意致之也。今歲直省大旱。皇上虔誠步禱。一雨而徧天下。禾稼將枯。復得成熟。所穫雖薄。幸無大饑。臣之總總過慮者。惟在來年農事矣。如閩地兵糧。取給本省。自海寇流毒。南畝盡爲戰場。漳泉二府。顆粒難飽。民不堪命矣。臣見督臣姚啓聖疏。參不肖縣令。一則曰民怨沸騰。通縣逃避。一則曰訐告不休。官民成讐等語。不勝驚訝。方今海疆多事。儻州縣將弁等官。不加撫恤。反行殘害。或苦民供應。驅民役使。借民糧米。虐民室家。臣恐百姓困苦。不務耕耘。煽惑勾通。揭竿走險。一可慮也。又如直隸山東河南江浙等處。俱係產米之鄉。南北兼賴。輸將難緩。近日解馬一事。關係軍務。每解一次。挑出瘦病弱馬匹。照數賠補。道府州縣等官。衝路難支。勢必均派。均派無出。勢必暗取。臣恐暗取累民。以致耕種無力。賦稅難供。因而輕去其鄉。二可慮也。又如河工一事。關係重大。旣動錢糧大修。今自江南徐州河南山東地方。四百里隄岸。又欲撥民夫修築。雖旨下各該督撫。自有酌議。萬一攤銀派夫。處處騷動。臣恐荒歉之餘。牛種不足。又苦重役。或致逃亡流散。三可慮也。其餘地方。或寇賊殘破。元氣大傷。田荒人少者有之。或兵馬屯集。運送繁多。輟耕罷耒者有之。此則病民妨業之大略也。至於無事之地。正當與民休息。賢有司屈指有幾人哉。又恐不肖官員。罔恤百姓之艱難。不念農桑之

切要。或以兩造之訟。破人身家。或以無名之徵。奪人耒耜。當青黃不接之時。望隴畝而興嘆者。不知凡幾。逃亡不免於相繼。地丁必至於多逋。是地方少一荷鋤負耒之人。卽國家少一納糧供稅之人矣。今日者。萬方之供無窮。公家尙有匱乏之慮。終歲之入有限。農家豈是不涸之倉。下官取之。上官又取之。前官取之。後官又取之。官日富民日貧。官有權。民無告耳。層層剝削。公私交困。此又民窮財盡之大略也。從來有道之朝。父老得見至尊。陳疾苦。洵盛事也。皇上堯舜爲心。一夫不獲。引爲己咎。儻深山窮谷之內。有含冤忍死之氓。冒瀆闕下者。諒必惻然動念。洞知民間疾苦。果有壅於上聞者也。轉盼春和。東作方急。臣按月令。天子布德行惠。此其時矣。如臣愚昧。所言可慮之處。皆在宸慮遠徹之中。伏望特加軫恤。起念卽是陽春。海宇莫非元氣。至於直省各督撫。奉天子命。以撫綏地方。當於民間之疾苦。善爲調劑。卽於有司之賢不肖。力加勸懲。凡有開徵補庫。包荒借富。鞘本公費。解費部費等項。私派名色。及徵收錢糧。每一兩加火耗二三錢至四五錢者。通行嚴禁。一切報罷。惟以政簡刑清。務農重穀。爲循良第一事。如遇大計註冊。並二年舉劾。亦以此爲上上考。其部民流亡失業者。下之俾小民既有父母妻子之安。又有雞犬桑麻之樂。國家元氣。太平景象。悉以耕田鑿井見之矣。豈獨民食足而軍需裕哉。如果臣言不謬。伏乞睿鑒。敕下該部確議。字多逾額。併乞鑒宥施行。爲此具本。謹題請旨。康熙十七年十二月初十日題。十五日奉旨。該部確議具奏。

又

都察院左都御史臣魏象樞謹題。爲學道一官。關係士風文教。請嚴考核。並杜積弊事。臣惟天下之最爲不平者。孤寒無進步之路。而天下之牢不可破者。學道多昧心之人。此一官者。乃士風淳澆文教興廢根本。而卽國家人才真僞之關頭。故直隸特用翰林。各省俱以進士陞授。誠重之也。其重之者何也。爲其素習經史。學問優長。較士閱文。衡鑒不爽也。又爲其寒窗燈火。半世艱難。諸生辛苦之情。備嘗於前。必能曲體於後也。又爲其讀書立志。理欲分明。師嚴道尊。楷模多士。所重者孝弟廉讓。所惡者奔競鑽營。且上有功令。中有清議。下有子孫。時時警惕。良心難昧也。乃近年以來。賢者雖有一二。而其大謬不然者多矣。口讀聖賢之書。甘犯名教之罪。身居絳帳之內。竟如壘斷之登。從來入學額數甚多。士子進步頗易。今因捐納之例。暫將府學減爲五名。大學減爲四名。中學減爲三名。小學減爲二名。猶夫銓選之分缺並用。以見朝廷於軍需開例之中。尙留孤寒入學之路。爲學道者。亦何忍將此路盡爲其利藪。令孤寒之子。廢書痛哭。投筆而怨恨哉。今當舊學道考核之時。據臣所聞。內有考較公明。士子悅服者。首則江南之邵嘉。次則山東之勞之辨。可謂雞羣之鶴。中流之柱矣。若肆行無忌。士子痛哭而怨恨者。首則山西之盧元培。次則浙江之程汝璞也。請敕吏部。詳加考核。分別優劣。作何勸懲。以昭公道於天下。再敕禮部。磨對學冊。分別新舊。有無混冒。以杜蒙蔽於將來。至於現陞學道。率皆老成持重。抑且新發於硯。臣何敢以不肖之心待之。但不許赴席受賀。以開後日干求之端。更不許罔上行私。以蹈前人賄賣之弊。臣謹列十款。以爲三年考核之實據。一曰童生未經府考。冊內無名。鑽求學道。徑取入學。巧圖捷便。此一弊也。二曰考試各府州

縣衛所重生。額外溢取。撥發別學。明收冒籍。以佔本學正額。此一弊也。三曰彌封編號印簿。及場內坐號紅簿。不發該府州縣封貯。乃收存道署。私查某卷某號。係某人對號賄賣。此一弊也。四曰考完一府。不將紅簿速行發學。任意遲延。徇私通賄。更改等第。拔下作上。此一弊也。五曰每考一處。令書辦承差快手人等。出入過付。暗訪生員。稍有家貲者。先開六等草單。嚇詐保等銀兩。送入准放三等。此一弊也。六曰文童頗少。武童頗多。將文童充爲武童。入學之後。資緣改文。娼優隸卒。濫行收取。善騎射者。擯而不錄。此一弊也。七曰各府地方。設有考棚。憚於親臨。將生童遠調考試。其各州縣告病生員。扛擡驗病。困苦難堪。此一弊也。八曰縱容無賴教官。包攬生童。私通線索。效勞分潤。名爲作興。大壞風教。此一弊也。九曰曲徇上司同僚情面。並京官鄉宦私書。及親族朋友。隨住地方。討情抽豐。將孤寒之文。棄如糞土。此一弊也。十曰報部學冊。將額外溢取入學之童生。未經科歲考試。預附三等。其姓名不入新案。造入事故衣頂項下。以趙甲頂補錢乙。混作實在之數。蒙報禮部。此一弊也。以上十弊。能除則爲賢。不能除則真不肖矣。人各有心。誰肯爲不肖哉。惟在皇上嚴行申飭。考課實蹟。督撫不許需索陋規。州縣不許傳遞私書。親朋不許私往。關說。鄉紳不許投刺請席。俾學臣得以自愛其名節。實修其職業。如果甘心不肖。則臣之白簡在後矣。至於科歲兩試報完之日。例應該督撫將學道稱職者薦舉。公明尤著者保舉。徇私溺職者指參。原非令其咨報也。嗣後該督撫分款註明十弊。有無字樣。合詞具題。吏部照例考核。但學院任滿。自報吏部。並無實蹟。考核何事。亦宜自行具疏。十弊作何釐剔。逐一題明。吏部一體考核。儻有捏飾違錯。仍以咨文報部者。

吏部駁參將督撫學院照何例處分。其十款例冊未載。如有指參發覺。將學臣又照何例處分。統乞敕部確議。一並嚴飭。務使開報與考核。確然有據。士風與文教。肅然一新。庶幾仰副我皇上憐才右文之盛心矣。緣係列款。字數逾格。並乞鑒宥施行。爲此具本。謹題請旨。康熙十八年正月十一日題。十八日奉旨。該部確議具奏。

又

都察院左都御史臣魏象樞謹題。爲糾參事。臣於本月初十日。陪祀畢入署辦事。投到直隸河間府滄州公文一角。內開爲悖旨腹剝無壓。寒員難支。冒罪出首。甯甘罷職歸旗事。竊照滄州水陸交衝。滿漢雜處。其地瘠民貧。役重差繁。焚焚赤子。其僅存者無幾。莅茲土者。卽節儉自持。加意軫恤。猶恐不足以副朝廷保赤之至意。况當斯時。若循餽送之私例。加以無壓之誅求。夫果何所出乎。卑職以服滿起復。新補滄州。於十七年十月十八日到任。卽遇鹽院出巡。至二十二日。方離州境。突於二十三日。又有天津道胡應麟解御馬回旋。路經滄州。擬欽定新例。其於驛馬之宜騎與不宜騎。自有明條。其騎驛馬之多與少。自有定數。乃卑職以親臨上司入境。自當曲爲供應。凡一切下程小飯。及柴炭草料之類。無不逐項預備。究因苛索。貸見之常規不遂。兼以從行之使費未周。有劉快頭王前跼。率衆內司與衆夜役等。羣擁於卑職面前。恣意辱罵。將兵房范如錫。工房田復昌。肆兇毒打。有余州判見證。似此官受無端之辱。役受鞭撻之苦。夫誠含冤容氣。而無可告訴者。及次日起程。將自備之馬。空趕而行。立索驛馬十八匹。脚騾三十四頭。浪船

一隻。捧夫十名。有解驛丞見證。且其驛馬夫船。經四日方回。較之欽奉緊急部差。未有如此之甚者。繼而卑職赴府。查對前任李牧任內錢糧。未能躬謁津道。卽罄囊備禮四十兩。差役赴天津投送。乃惡其過薄。未收。繼又蒙府票。調取赴留智廟。聽候接送御馬。至於十二月初旬回州。而年節又已相迫。無奈又委曲借辦。湊正禮八十兩。張管家小禮四兩。差役赴天津道投送。及領收批旋州。究以前此缺少贊敬。繼此不去親見爲詞。猶深切齒。意必新春拜節。較常規外另爲點綴。始補贊見則例。夫上司任肆其誅求。寒員何能當其魚肉。雖於十七年九月內。已蒙題定屬員不許謁見上司餽送禮儀一案。誠深見夫新補官員。未嘗攜貲而來。恐致剝民膏以飫上司之鯨腹也。然而天高聽遠。可奈何。將欲不爲供應。則無愆而生愆者勢也。將欲遂其歡心。則動支庫銀。恐虧正額。屢爲借貸。無所補償。薄猶莫措。厚從何出。夫以親臨上司。悖旨虐驛。違例吞屬。若此。則新補寒員。行將立斃。懇祈洞鑒。實情上達。甯甘罷職。以歸旗。實難逢迎。以俸位等語。臣職司風憲。既有知州印文。舉首道臣胡應麟情節。雖虛實未定。不敢不以上聞。伏乞敕下該部。嚴察明白。重加處分。以肅法紀。至於知州閔三元。舉首公文。應寫都察院字樣。以便公疏糾參。乃止寫臣一人官銜。並臣之姓。殊屬違例。理合並參。統乞敕部察議施行。爲此具本。謹題請旨。康熙十八年正月十一日題。十八日奉旨。該部嚴察議奏。

又

都察院左都御史臣魏象樞謹題。爲直糾浙江學道。以申公論。以重京堂事。臣於正月十一日。具有學道

一官一疏奉旨。該部確議具奏。欽此。隨經吏部議覆。請敕山西巡撫、浙江督撫、將盧元培、程汝璞、肆行無忌、士子痛哭怨恨之處。查明具題。到日再議等因。奉旨。九卿詹事科道會議具奏。欽此。仰見我皇上離照洞澈。故特下廷臣會議。此正公道大彰之時。可破督撫瞻徇之習。臣無庸贅言矣。但盧元培劣蹟。既未考核到部。該撫自應詳查。皇上自有睿鑒。惟程汝璞已經該督撫保舉公明尤著。應陞京堂。輦下閏傳。以爲異事。賢否顛倒。一至於此。臣思今日京堂之席。卽異日卿貳之選也。每見科道內陞。聖心其難其慎。有時停止。以觀其才品。若程汝璞者。一貪汙匪人耳。何堪濫竽清班。辱朝廷而羞當世耶。臣訪其蕩檢踰閑。士子怨恨。前疏請敕吏部詳加考核。不意吏部仍問之督撫。而督撫已保其公明。則賢不肖之相去。不啻徑庭矣。如臣不指其劣狀。恐汝璞以榮辱得失。在督撫爲政。又有同鄉聯宗之中書程化龍。暗中揄揚而照拂之。京堂可唾手而得也。豈知廟堂之上。公論照然。是非可否。確有不容溷淆者哉。臣略指數款。敢爲皇上陳之一童生入學。各有定額。本官濫取多人。聽蠹書祁茂之等。創立社師名色。不論優隸賤役。卽與批呈。仰學入冊。准作社生。每府多寡不一。每名得銀一二十兩不等。如烏程縣學批准李沆、陳夏。嚴而溫、潘永銓、費存範等。共二十三名。學冊可據。其餘如嚴州等府。淳安、桐廬、遂昌等縣。俱可查。一本官以訪摺有過生員爲名。行牌各學。嚇銀餽入免摺。如歸安縣武生陸亮。陸京殷儒可啖。時值丁艱。不與考試。駕名密訪。囑本學吳教諭密摺。勒詐銀六百兩方免。被害生證。一本官濫准詞狀。動輒親提。指事勒索。康熙十六年十二月間。杭州布政司吏典方秀齡。與生員吳挺生兄弟有隙。本官受賄。准狀提審。至十七年四月。籤

拏鎖押吳挺生逼獻銀一百二十兩。錢塘學生員陳士錄吳永源過付被害生證。一考案未發預使書役分頭播揚擇殷飛噬到處皆然。如康熙十六年歲考湖州府學蔣駿聲應置六等託廩生夏嗣餽銀五十兩拔爲三等。德清學生員沈射斗餽銀五十兩拔爲三等。長興生員錢兆瀛應置六等餽銀六十兩拔爲三等。惟生員李仁未餽竟置六等各本生證。一考試各府勒索教官贄見陋規大學二十四兩小學十二兩凡有新任亦照例餽送不餽者口罵奴才嚇放下等以示凌辱。如餘杭縣學教諭關僊渠赴任於十七年九月間申報受事詳文因未餽獻捏稱錯寫名帖籤拏揚言揭參詐銀一百二十兩方免。關教官證一生員遺才科舉每名勒銀二十四兩後減爲十二兩方准收考取名入場以致寒士無銀三四百人於巡鹽御史衙門號哭數日本官聞知方准送場鄉試。一浙東山僻地方無人賄買其重生入學故缺額數將別縣文武童生不論籍貫卽行撥補以致小邑怨恨凡係本縣造送府考冊內無名者俱係冒籍一查情弊顯然。一康熙十七年二月考試嘉興錄取嘉善儒童魏肅首名入泮因未餽獻七月曾經錄取遺才倏行牌除名詐銀四十兩復行銷牌。本生並邵教官證。一桐廬縣積蠹孫時昌董尙文侵欺康熙十四年草價銀兩里民控告藩司知縣王俊恨生員邵企聖直證發帖誘入後堂立斃杖下捏稱服毒申詳督撫批駁可據。本官受賄多金不爲准理以致冤枉未伸伊子邵秀魁妻皇甫氏親人王日祁羅啓兆等證。一本官訪知長興縣俊秀王宸琦王夢昌武生王兆熊家道殷實於康熙十七年三月間發票嚴查冒濫緣由行縣審究詐銀三百兩武生王兆熊未餽除名被害生等證。一本官職司風教蕩檢踰閑每於按臨考試

私帶姬妾。忽以七相公乳母爲名。忽以閱文相公爲名。用輜擡入試館。肆行無忌。士子非笑。一嘉興府等處。有十可怪之謠。一可怪。增廩入學一齊賣。二可怪。嚇詐教官罵奴輩。三可怪。到處出巡帶奶奶等語。皆本官實蹟。餘可類推。以上諸款。若行查督撫。誰敢將督撫所保之人。從實供證。卽督撫必不肯將自己所保之人。據實查參。惟有九卿詹事科道廷議於下。皇上神明乾斷於上。以滿朝之公論。定此案之是非。如會議諸臣。有一人言汝璞堪陞京堂者。則臣之所言謬矣。臣願甘引咎。不敢辭也。抑臣更有言者。督撫薦舉官員。從無自開事實之理。况保陞京堂。關係重大。查督撫原疏。學道邵嘉報滿文內。止稱職分當然。不敢侈言勞績。迨江南兩撫咨會總督。該督始行江安布按四司。查取事實確據。核覆具題。庶爲慎重。今查浙撫疏內。學道報滿詳文。有本道任內行過事實。造冊現在等語。是本官自開事實也。學道爲臬司衙門之官。臬司瞻徇情面。全無核駁。掩其劣蹟。飾以虛詞。照造藩司。轉報督撫。眞所謂目無功令。心有同官。總非確定之官評。不過優陞之贊助。其溺職尤甚矣。以後此等保薦疏內。自開事實者。吏部查明駁參。以存大體。統乞睿鑒施行。爲此具本。謹題請旨。康熙十八年二月十二日題。十七日奉旨。九卿詹事科道一併會議具奏。

又

都察院左都御史臣魏象樞謹奏。爲遵例自陳不職。請賜罷斥。以肅察典事。臣等衙門會議京察。定例三品以上堂官。俱令自陳。臣年六十三歲。山西蔚州人。順治三年進士。本年四月。考選庶吉士。四年七月。改

授刑科給事中。五年七月，陞工科右給事中。七年四月，轉刑科左給事中。九年十二月，陞吏科都給事中。十一年七月，降補詹事府主簿。十二年三月，陞光祿寺署正。九月，陞本寺寺丞。十三年六月，給假省親。十四年九月，仍補寺丞。十六年六月，終養。康熙八年六月，丁憂。十年九月，服闋。十一年閏七月，奉旨來京引見。八月，補授貴州道監察御史。十二年八月，內陞。十二月，陞都察院左僉都御史。十三年二月，陞順天府府尹。四月，陞大理寺卿。七月，陞戶部右侍郎。十一月，轉本部左侍郎。十四年十二月，遇恩詔，加一級。十七年七月，陞補今職。除十二年三月以前事蹟過愆不開外，臣在御史任內，十二年五月內，爲題明盜案事，罰俸一年。九月內，爲自請議處事，罰俸一年。又在大理寺卿任內，十三年七月內，爲檢舉事，罰俸六箇月。又在戶部侍郎任內，十四年六月內，爲檢舉事，議罰俸一箇月。奉旨寬免。十五年七月內，爲查參事，罰俸一箇月。九月內，爲檢舉事，議罰俸一箇月。奉旨寬免。本月內，爲檢舉事，應察議，援赦免議。十六年四月內，爲檢舉事，議罰俸一箇月。奉旨寬免。十七年六月內，爲請照舊例收稅事，奉旨罰俸一年。臣一介腐儒，才庸學淺，荷世祖章皇帝培養生成之大德，復蒙皇上召起擢用之洪恩，歷任多年，毫無善狀，過愆日積，負乘貽羞。今忝列總憲，責任重大，閭閻劣如臣，實難勝任。且以孱弱之質，當衰老之年，眼目昏花，心血耗竭，不能爲朝廷振揚風紀，表率羣僚，溺職負恩，夙夜何安。茲值察典自當首黜，伏乞皇上立賜罷斥，以爲尸位不職者戒。庶澄敝嚴而官方肅矣。臣不勝惶悚待命之至。爲此具本，謹具奏聞。康熙十八年三月初四日奏。十七日奉旨：卿端亮練達，簡畀風紀，著殫心供職，以副委任。不必引例求退。該部院知道。

又

都察院左都御史今補授刑部尚書臣魏象樞謹奏。爲驚聞寵命直陳下情。據實控辭。仰乞睿鑒事。臣一介腐儒。才識闇劣。謬叨簡命。優擢今職。莅任九月。毫無寸長。前蒙天語褒嘉。謂臣居官勤慎。每於奏對之時。剴切詳明。不負職掌。特賜臣御書唐詩一卷。御筆清慎勤格物大字各一幅。隆恩異數。訓勉兼施。愧無嘉謨。徒邀曠典。臣不覺感而欲泣也。近者京察。自陳不職。亟請罷斥。奉旨卿端亮練達。簡畀風紀。著殫心供職。以副委任。不必引例求退。該部院知道。欽此。臣非木石。敢負生成。縱矢捐糜。難酬高厚。念臣風紀之任。如蚊力負山。正當貪風日長。吏治不清。大吏因循。小民困苦之際。仰見皇上宵旰焦勞於上。臣不計身家。不避嫌怨。奉朝廷大公之法。與海內臣工共相遵守。半年以來。內而科道。外而督撫。參劾之疏。屢達御覽。已有澄清之機。而道府以上。大貪之官。尙多漏網之輩。臣職司風紀。夙夜兢兢。其所以報效皇上之心。一刻不敢自安也。頃於本月二十四日。吏部宣旨。魏象樞補授刑部尚書。欽此。臣跪聽綸音。感愧無地。伏而思之。東西南北。惟天子命。爵祿名位。爲臣子榮。曷敢控辭。但臣有下情。不敢不實告於君父之前。臣讀史見漢臣汲黯之言曰。臣常有狗馬之心。病力不能任郡事。願爲中郎。補過拾遺。臣之願也。臣自揣才分。實不如汲黯。乃妄欲勉竭愚悃。激濁揚清。爲皇上振肅紀綱。或者貪風漸息。吏治漸清。大吏去其因循。小民蘇其困苦。未可知也。堯舜在上。夔龍在下。立奏熙熙太平之治。非臣所能及。臣之願亦與汲黯等耳。今總憲之職業未盡。而尙書之簡命又聞。皇上之寵榮有加。而微臣之報稱愈歉。恭繹簡畀風紀著殫心供

職以副委任之旨。感激惕勵。寢食靡甯。因敢據實控辭。至臣身弱年衰之狀。前已奏明。不敢瑣瀆。伏乞皇上鑒臣無欺。收回成命。另簡賢能。俾臣勉持風紀。循分盡職。仰報天恩於萬一。庶幾狗馬之心。得以少安矣。臣不勝惶悚待命之至。爲此具本。謹具奏聞。康熙十八年四月二十五日。奏。五月初二日。奉旨。魏象樞著加刑部尙書銜。仍留原任。

又

都察院左都御史加刑部尙書臣魏象樞謹題。爲直糾不法司官。以尊國體。以明臣分事。竊惟朝廷之體。至大至尊。如天在上。不敢褻也。不敢私也。正所以不敢欺也。此古今臣子之正鵠。而亦古今臣子之大防也。乃不意有肆行不法。如刑部主事劉源者。奉差蕪湖關收稅。通商裕稅。釐弊剔蠹。是其職分。敕書開載甚明也。源自當恪守成規。不得分外生事。以致擾害商民。而乃膽大心驕。窮奢極欲。恃才妄作。舉動異常。臣聞在差之日。製造器皿等項。鳩工辦料。皆肆市所無。沿途座船十三四號。所過地方。不敢收稅。及至回京之日。大車數十輛。每車各有隨護親丁三人。騎馬帶械。填街塞巷。宣武門外。觀者如堵。人不能行。一時道路相傳。係上用之物也。臣聞之不勝駭異。源不過收稅之官。非製造上用器皿之官。如上用有需。自敕所司製造。斷無令收稅官員製造之理。如擅行製造。已屬不法。况稱上用之物。地方各官。生疑生懼。若假若真。因而供應多方。奉承恐後。亦未可知。不然。數十車滿載而歸者。其中又是何物。卽曰器皿自用。而窮工極巧。所費不貲。此等銀兩。豈有點金之術。若非橫徵暴斂。巧剝商賈之膏脂。必其罔上行私。暗取官民

之供應。臣實不能爲源解矣。凡爲臣子。受皇上之恩。自當守皇上之法。源小臣也。若肆行妄爲。顯則爲小忠。小信之心。陰恐有干名犯分之事。源雖有其心。而無其事。則將以天子爲敢於褻。敢於私。推此心也。終難保其不敢欺矣。儻日後權關各差。聞風尤效。借製造器皿之名。恐嚇地方。巧取商賈。長貪風而開利竇。皆自源一人作俑。源清夜思之。將何以自解乎。源之驕恣貪汙。難逃皇上電照。但國體不可一日不尊。臣分不可一日不明。臣職司風紀。有聞必告。如臣所言不謬。伏乞聖明鑒察施行。康熙十八年七月二十八日題。八月初四日奉旨。該部嚴察議奏。

又

都察院左都御史加刑部尙書臣魏象樞謹題。爲撫臣因循溺職。仰祈鑒察。以昭風紀事。竊聞治道首戒因循。國法最嚴。徇庇。況學道一官。乃士風文教之所係。儻有不公不法。撫臣自宜朝聞而夕奏。始稱克盡厥職。不負聖恩者也。臣於山西巡撫土克善。有不能爲之解者。敢爲我皇上陳之。如山西前提學道盧元培者。劣員也。嗜酒賭錢。無所不至。衡文範士。防檢蕩然。該撫縱容三年。聽其肆行無忌。今歲二月間考核之際。方以不謹糾參。奉旨將元培革職。其不謹事情。嚴提究擬。該撫宜遵旨嚴究。水落石出。非可以一二衙役塞責矣。今新道到任已久。乃將前道事情。仍未究明。臣不知其何意也。夫元培貪汙之款。閱文之弊。或詭秘難以究詰。若粟生一事。公然爲之。顯然見之。乃從來未有之奇聞。撫臣可諉之不聞耶。按文童入學。大學四名。中學三名。小學二名。暫減額數。捐納濟餉。武童因無捐納。仍照原額。不許溢取。元培每考一

次無論文武童生正額之外任意多取名不列榜票發收學名曰票生有州縣府送考冊內有名者有州縣府送考冊內無名者有一二次發學者有三五次發學者有書辦人等改名改籍發學者有一字不通並無試卷發學之後方補試卷者有此處之人冒籍發入彼學者有發入彼學縣官不敢私收冒籍者有一處多取一二十名不等者有一處多取四五十名不等者約計不止千名若係捐納該銀十萬餘兩戶部冊內可查也若係正額該入新收項下禮兵二部冊內可查也若未經科歲考試不入新收竟附三等學冊蒙報二部忽而不查亦未可知而各學所發紅案內或新或舊皆可查也但新道考試在邇此時仍不查明儻各府州縣混作生員令教官一概送考學道一概收考不但士子讀書短氣學校無光將朝廷崇文重武之休風竟成壞法亂紀之世界若非撫臣示意元培准其額外多取元培雖膽大包身豈敢溢額濫取目無功令一至於此乎據臣所聞元培每考一府與撫臣有饋獻之常規又曲爲諂媚與撫臣有賭輸之妙計臣雖不敢執以爲據但貪汙之官如豺狼然人人所惡也或壞朝廷之教化或害朝廷之黎民尤皇上所惡也而撫臣獨不惡之豈獨元培一人哉其屬官貪汙者頗多而糾參者絕少間有糾參不過輕描淡寫並不摘發贓私是教之貪也卽有自愛之人亦爲時勢所迫變其操守無可奈何而已貪官又何憚而不肆行耶如謂撫臣高坐省會耳目難周道府等官揭報未到而匿不揭報之官必是貓鼠同眠之官撫臣何不指參一人以致上下相蒙大不法小不廉耶撫臣身在地方受封疆之重寄察吏安民是其專責士風文教更有關係如元培者旣縱於前復庇於後巧卸衙役蒙混結局將皇上之明旨視爲

弁髦而人心之公憤置之不問。因循溺職。臣不能爲撫臣解。恐撫臣亦無以自解矣。臣職司風紀。有聞必告。如臣所言不謬。伏乞聖明鑒察施行。康熙十八年七月二十八日題。八月初四日奉旨。該部一併嚴察議奏。

又

都察院左都御史加刑部尙書臣魏象樞謹題。爲君心仁愛無盡。督撫實政當修。恭請嚴綸。除三不便民之弊。以收五便民之利事。臣惟天心仁愛萬物。而法天之心者。君也。君心仁愛百姓。而體君之心者。臣也。總在一己之真心。以修一代之實政而已。近者捧讀上諭。令各該地方大吏。督率有司。曉諭小民。務令力田節用。多積米糧。仰見我皇上愛養斯民至意。此根本之計也。戶部諸臣。又請修舉常平倉。兼令鄉里自行義倉社倉。以備凶歉。此補救之方也。臣謂藏富於民。經久不匱之道。要在有司留有餘於百姓。而上官留有餘於有司。則火耗私派勒詐三大弊。不但於根本有害。亦於補救相妨也。臣敢悉言之。百姓種地。有上中下三等。收穫亦有上中下三等。約計豐年上地。每畝收八九斗。中地次之。下地又次之。除牛種人工納糧辦課而外。所贍幾何。贍養父母妻子。男婚女嫁。歲時伏臘之用。皆賴焉。無奈上官取之於有司。有司乃收取之於百姓。以直省總計之。徵收錢糧。每兩加火耗銀。至二錢三錢四錢五錢各不等。是國家收正賦一百萬兩。百姓多費三五十萬矣。又有各項私派。種種不一。按糧攤灑。明催暗收。總而名之曰補庫。謂有司動用庫銀。應令百姓補之也。分而名之曰坐派。曰開徵。曰包賠。曰解費。曰水脚。曰供應。曰津貼。曰運

送。曰預借。以及無名雜差等項。謂地方凡有設處。俱從百姓取之也。每年私行派取者。又不知幾百萬兩矣。或指人命盜案。逃人戶婚。田土爭訟等事。每年勒詐百姓財物者。又不知幾百萬兩矣。嗟哉。百姓終歲勤苦。夫耕婦饁。指望西成之後。保此蓋藏。得免飢寒。乃因貪官逼迫。致將米穀賤糶。同於泥沙。即欲多積。必不得之數也。間有循良之吏。稍恤民命。百姓所喜者。上官必不喜。惟喜其最不肖。善取錢者。坐收漁人之利耳。且從來部臣議覆條陳諸疏。不過曰如有火耗私派勒詐等弊。苦害小民者。或被糾參。或被出首。嚴加處分等語而已。科道既不敢風聞糾參。即督撫糾參者。亦不過輕描淡寫。間有一二撫臣。列款指出前弊者。而撫參督審。反爲脫卸。不欲深求。則是教猱升木矣。貪風何日息。民生何日遂乎。爲今日計。欲修耕九餘三。貴粟重農之實政。斷非禁火耗。杜私派。嚴勒詐不可。如督撫潔己奉公。表率於上。實心體訪。有犯必糾。布按道府等官。看督撫爲榜樣。俱不敢索取有司之錢。而有司寬然有餘矣。有司畏上司之糾參。必不敢巧取百姓之錢。而百姓寬然有餘矣。歲省百姓千萬兩無名之費。留在閭閻之中。家給人足。仰事俯育。俾正賦可以早完。一便也。小荒可以相濟。二便也。盜賊可以潛消。三便也。逃亡可以漸歸。四便也。常平義社等倉。可以次第舉行。五便也。去三不便民之事。而得五便民之事。庶幾哉。仰副至尊愛養斯民之盛意也。地方大吏。又當刻意修省。崇儉黜浮。正風俗而塞盜源。去虛文而修實政。蝗旱災傷之地。倍加撫綏。凋殘疲困之民。作何調劑。如果直省之內。風清弊絕。物阜民安。督撫亦可從容奏效矣。孟子曰。聖人治天下。使有菽粟如水火。菽粟如水火。而民焉有不仁者乎。此王道也。王政也。若非皇上嚴諭申飭。務去三

弊以培根本。督撫諸臣。未能盡體仁愛之心。安能實行仁愛之政。臣恐三不便民者未除。而五便民者亦卒寡效矣。豈於愛養有裨哉。如果臣言不謬。伏乞睿鑒施行。康熙十八年七月二十八日題。八月初四日奉旨。該部確議具奏。

又

都察院左都御史加刑部尚書臣魏象樞謹奏。爲微臣溺職難辭。良心不能自昧。請賜重處。以回天變事。臣跪讀上諭。因地震之變。譴告非常。內外臣工。不能精白乃心。恪盡職掌。著據實自陳。臣泣而思之。地道者。臣道也。臣不修職。則地道所以有虧。天心所以示警。臣自返良心。何敢欺君掩罪。念臣才庸識淺。身弱年衰。歷任多年。毫無善狀。忝司風紀。勝任未能。本年三月內京察。已經奏明。嗣因陞補刑部尚書。益加惶愧。疏請願供原職。勉圖後效。奉旨將臣加刑部尚書。仍留原任。臣謬叨知遇之恩。矢竭犬馬之報。乃職掌未盡。異變忽生。其致此者。必有由也。夫吏治不清。由督撫之貪汙致之。綱紀不肅。又由臣之因循致之。若能整飭羣僚。激濁揚清。豈至上干天怒耶。清夜自思。則臣溺職之罪。擢髮難贖矣。我皇上修省方殷。挽回天變。臣之素餐尸位。良心何安。國法難容。伏乞敕下該部。將臣嚴加處分。以爲後戒。而地道自甯矣。臣不勝惶悚待命之至。爲此具本。謹具奏聞。康熙十八年八月初二日奏。本月初八月奉旨。魏象樞著照舊供職。該部知道。

又

都察院左都御史加刑部尚書臣魏象樞謹題爲遵諭舉廉以惜人才以勵官方事臣謬在風紀不能激濁揚清每一撫心惶愧無地前隨諸臣之後跪聽上諭諄諄以用得其人爲要以操守清正爲本又於本月初四日隨吏部滿漢諸臣面奉上諭更見進退黜陟務期確當之盛心臣思用人首在知人懲貪必先獎廉謹按周官六計弊吏曰廉善曰廉能曰廉敬曰廉正曰廉法曰廉辨咸冠以廉也京察大計冊開四註曰守曰才曰年曰政以守爲先也人生大綱有四曰忠曰孝曰廉曰節是廉吏與忠臣孝子節烈並重也邇來吏治不清貪以爲能廉以爲拙雖風俗漸染實由臣等不能表率所致今天語旣宣之後砥礪名節者當必躍躍而興起其在天語未布之前謹守廉隅者亦未可泯泯而無聞也孔子曰舉爾所知臣雖不才無所知識又何敢沒人之善以負我皇上至公至明至虛之心哉除諸臣現任部院等衙門皆聖心洞悉者臣不敢舉其在外各官已經會議令督撫將現任清正賢良者薦舉臣亦不必舉臣謹將侍郎以下素有清廉之名者滿漢得十人爲我皇上陳之原任戶部侍郎雷虎滿洲人老成愷直清名甚著臣在戶部時司官言及此人無不嘆服臣雖未識其面常慕其人今請告在旗聞其年齒稍衰原任戶部侍郎班迪滿洲人居官清正臣曾共事二年又奉旨同查戶部各庫見其念念爲國後奉差江西臣不知因何事處分今降級隨旗上朝原任兵部督捕侍郎達哈塔滿洲進士清謹自守四壁蕭然人有醇樸之風行無奔競之習今京察降級原任刑部侍郎高珩山東淄川縣進士性甘淡泊志絕俗塵並不自有其身安知世有富貴今告病在籍年過六旬原任大理寺卿胡密子滿洲人清謹自守家道甚貧素聞安靜之風

兼有讀書之志。今京察降級。隨旗上朝。原任吏部郎中內陞宋文運。直隸南宮縣進士。清而且直。守正不阿。掌選之時。錚錚有聲。臣與同時內陞。識其一面。今候補在籍。原任翰林院侍講蕭惟豫。山東德州進士。督學畿輔。大著清名。士子至今頌之。臣雖不識其面。曾聞其人。今終養在籍。原任湖廣布政使。未任告病。畢振姬。山西高平縣進士。歷任部郎道員臬司。清操絕世。才略過人。請告十餘年。躬耕百畝。猶讀古不輟。臣前以有體有用薦之。左副都御史劉捷。亦薦其操守清嚴。一塵不染。至回籍之日。一僕一馬而外。了無長物。真學行兼優之人等語。係臣丙戌同榜。年過六旬。原任直隸內黃縣降調知縣張沐。河南上蔡縣進士。清操惠政。深得民心。有古循良風。因註誤鐫級。去任之日。老幼追送。臨河尙不忍捨。其愛戴如此。臣雖未識其面。曾聞其人。今保舉軍前候用。原任江南嘉定縣革職知縣陸隴其。浙江平湖縣進士。清操飲冰。愛民如子。因註誤被革。萬民怨恫。未去而皇皇罷市。旣去而家家尸祝。又聞與妻同駕小舟。惟有圖書數卷。其妻織機一張而已。前薦舉博學到京。臣有一面之識。今丁憂在籍。以上十人。有候補者。有候用者。有告病者。有終養者。有降級者。有革職者。臣祇就平日之清操。仰陳於座右。俾天下曉然知此等清廉之人。當世所輕者。而朝廷特重之。其曾任京官者。原在器使之中。擢一人而四方觀感。其曾任外官者。雖無起用之例。襲一字而千載光榮。皆非臣之所敢必也。若臣所舉非廉。有違天下之公論。臣自不敢辭咎矣。統乞睿鑒施行。康熙十八年十月初五日題。十二日奉旨。據奏雷虎老成慤直。清名甚著等語。此人朕亦素聞其清。因補授戶部侍郎。見其凡事不肯身爲擔當。儉安之日居多。如問以本衙門官員。但稱其好。惟恐

獲罪於人。不肯直對。且督修孝陵之時。多費錢糧。造冊又不開明款項。以致後來無憑稽察。茲者數年以來。當用兵需人。凡有血氣者。皆宜奉職效力之時。雷虎係滿洲。乃家居安逸。文武之事。咸無所預。其身又無大病。朕亦知之。欲俟事平之日。將此輩察處。以懲怠惰。規避。今既經魏象樞特薦。著兼禮部侍郎。授爲內閣學士。班迪原爲內庭侍衛之長。因其勤慎。特加簡用。自爲戶部侍郎以後。嘗聞其清慎之名。及差往江西。所審軍機事情。並未明晰。問以民生苦樂。又不能知。緣此降級。令其隨旗上朝。非係未悉其故。餘著吏部詳議具奏。

又

都察院左都御史加刑部尙書臣魏象樞謹題。爲川省恢復在邇。軍需籌畫宜先。謹竭管窺。以佐遠略。事。臣於本月初九日。邸抄中。見奮威將軍王進寶一本。爲飛報恢復等事。奉有官兵追勦逆賊。直入漢中。賊首王屏藩等敗遁。恢復漢中府城之旨。仰見天威赫濯。廟算高深。非臣書生所能窺測。萬一者。臣此夜喜而不寐。知巴蜀之恢復在邇。黎民之水火可蘇矣。但臣思兵機神速。軍需浩繁。正在此時。雖大將行兵之法。因糧於敵。而逆賊蹂躪之地。剝削無餘。在地方各官自有接濟。以資飽騰。昨又奉上諭。嚴責督撫諸臣。諒不煩臣等之鰓鰓過慮矣。惟是因其時地。酌其緩急。既欲米糧之速至。又欲民力之稍紓。妄擬四款。其可否酌行。有無窒礙。謹冒天聽。聊佐司農之一籌而已。一曰行遞運之法。秦省幅幘甚廣。小民運送甚艱。若照從前長運。每運一回。動經千里。人病畜斃。再運不能接繼。合無各分地方。遞相轉運。或五里。或十里。

有人民可以存身造飯之處。派定人數。接運米糧。臣按元臣董搏霄短運之議曰。海甯一境。不通舟楫。軍糧惟可陸運。陸運之方。每人行十步。三十六人可行一里。三百六十人可行十里。三千六百人可行百里。每人負米四斗。以夾布囊盛之。用印封識。人不息肩。米不著地。排列成行。日行五百回。計路二十八里。輕行十四里。重行十四里。可運米二百石。每運給米一升。可供二萬人。此百里一日運糧之數也。今若倣而行之。斟酌此法。則糧可速運。一曰減捐納之數。漢中道路險遠。不通舟楫。捐納米糧。難以驟至。雖開捐納之例。未能速濟。合無於前議捐納之數。各減一半。令其捐納。俟明年四月以後。仍照原議之數捐納。通行曉諭。則人必爭先。一曰鼓販米之商。商人販米。總欲圖利。但漢中路遠。搬運艱難。今捐納雖開。恐販米者少。合無招商遠販。經過設兵地方。沿途防衛。到日照依市價。聽其糶賣。又於販米五百石者。給與九品頂帶。販米一千石者。給與八品頂帶。販米一千五百石者。給與七品頂帶。販米二千石者。以九品雜職用。販米二千五百石者。以八品雜職用。販米三千石者。以七品雜職用。多者照此遞加。聽督撫核明報部。使彼名利兩得。則商販自多。一曰勸急公之民。漢中州縣。被賊搜索。蓄積必少。康熙十八年錢糧。已不忍問。百姓雖有急公之心。實無急公之力。若效順之民。有願輸充餉者。大張明示。所收一石。准算明年錢糧二石。即時給與印照。則急公者衆。以上四款。不過區區管見。平平無奇。如果一二可採。伏乞睿鑒。敕議施行。康熙十八年十一月十一日題。十五日奉旨。九卿詹事科道會同確議具奏。

都察院左都御史加刑部尙書臣魏象樞謹題。爲遵旨明白回奏事。本月初十日。臣接吏部咨文。內開吏科給事中李宗孔題爲剖陳不敢列名之故等事一本。奉旨。這本內事情。著魏象樞明白回奏。該部知道。欽此。欽遵。臣理當靜聽處分。乃蒙皇上高厚之恩。令臣明白回奏。臣敢不披陳巔末。明白回奏。本月初二日。會推江西按察使一缺。臣等題參疏內已明者。茲不敢復贅。去年奉上諭。九卿詹事科道會議。凡奉旨會推選用者。臣等矢公矢慎。揀選真正清廉賢能之人等語。是日九卿等公議。如將張可前張永祺舉出之張仲舉推用。則唐朝彝稱其做官不好。如將張仲舉不用。止將宋德宜舉出之葉方恆楊大猷推用。則一正一陪。俱一人所舉。如另用一員。諸臣又無再舉之人。三者均屬不便矣。此所以自辰至午。茫無定議。斟酌再三。難以會推。今九卿等具在。一一可問也。宗孔既云衆論紛起。或以舉爲失實。或以駁爲過當。或以題明爲是。或以題參爲妥。此九卿之公論。非臣一人之意見明矣。宗孔面對九卿。並不言何者。爲是。臣乃向宗孔及御史謝兆昌。問衆掌科掌道主意如何。宗孔亦無一定之語。臣等滿漢同官。滿漢科道。同在一處商議。僉云舉賢用人。關係甚大。如此參差游移。成何體統。都察院科道均有言責。不敢不奏。彼時宗孔尙在也。及九卿既散。滿稿將定之時。宗孔竟諉之於臣等。不言而去。臣等同官李仙根。亦隨之而去矣。公稿不敢送到私宅。臣等理宜差筆帖式問仙根列名上本否。然臣等衙門並無問科。臣請科臣之事。宗孔乃稱書辦至其寓所。口稱都察院叫送職名。臣等亦不知何人所差。滿漢科臣。一一可問也。宗孔又以臣等參伊。爲吹毛索癢。爲打成一片。爲立威。爲私情等語。去年臣等題參九卿啓奏不到者。宗孔云。科道

原係一體。我們一同具疏。豈宗孔亦與臣等吹毛索癥打成一片。欲立威有私情乎。去年九卿詹事科道啓奏時。面奉有各官遇事。多有託故不畫題。及至後有錯處。推諉原未畫題。爾等都察院科道題參之諭。今臣等合詞題參。不敢諉之九卿者。遵上諭也。去年又奉上諭。九卿詹事科道。議得事應完者。不卽完結。畫題瞻徇。故無延捱日期。如司官各該堂官題參。若堂官科道官員題參。宗孔云。有願列名者。有不願列名者。不知何時定例耶。若宗孔無託故。無瞻徇。卽當於會推之次日。另爲一疏。將伊不畫題之故奏聞。何遲至初六日。臣等參伊之後。始行具疏剖陳耶。至於疏末。謂臣於無事中。必求缺失。效新進之風力。必欲一呼百應。無敢執異者。臣不知其何心也。等語。臣味此數言。埋藏結黨二字。用意甚毒。此事乃滿稿先定。譯出漢文。臣酌定畫題。宗孔謂臣一呼百應。果誰呼誰應乎。又云。不知臣爲何心。夫臣之心。宗孔烏足以知之。臣以匪才。起自田間。蒙皇上破格優擢。位列正卿。隆恩異數。千古未有。臣雖肝腦塗地。不足仰報萬一。躬逢堯舜之世。無偏無黨。同心協力。共佐太平。是臣之心也。况臣三十年來。叨蒙聖訓。亦嘗粗讀前史。見黨禍甚烈。心竊惡之。臣年六十有四。身帶痼疾。在世之日無幾。結黨之意何爲。今宗孔因公議公參之讐。獨歸罪於臣一人。且暗暗誣臣爲黨。總由臣性愚多言。不近人情。使臣一生之名節盡壞。有玷風紀。罪何所辭。惟束身待罪。靜聽皇上處分而已。緣係明白回奏。字數逾額。伏乞睿鑒施行。康熙十九年三月十二日題。十五日奉旨。該部一併察議具奏。

又

都察院左都御史加刑部尚書臣魏象樞謹題爲遵旨明白回奏事臣於本年十月二十六日接吏部咨內開爲徵臣衰老曠職資深懇祈俯賜罷斥以安愚分以勵官常事刑部左侍郎管右侍郎事高珩奏前事等因康熙十九年十月二十四日奉旨前魏象樞薦舉高珩疏內稱此等清廉之人當世所輕朝廷宜重等語及補用刑部要職以來並未見其寸長又經言官糾參其薦舉緣由著魏象樞明白回奏該部知道欽此欽遵臣捧誦之下不勝惶恐蒙皇上不卽賜處分令臣明白回奏臣敢不將薦舉緣由明白回奏臣蒙天恩召用已歷九年仰見皇上勵精圖治求賢若渴與古帝王同符臣遭逢聖明愧不能效以人事君之義去年七月地震以後我皇上憂勤惕勵挽回天心臣不才濫叨總憲溺職干和蒙皇上不加斧鉞之誅臣正當犬馬圖報之日彼時跪聽上諭一款有凡遇會推選用時皆舉其平素往來交好之人但言辦事有能並不問其操守清正仰知聖意首以操守爲重臣曾具有遵諭舉廉一疏內薦舉原任刑部侍郎高珩性甘澹泊志絕俗塵並不自有其身安知世有富貴今告病在籍年過六旬等語原因珩素有清介之名臣於順治十六年以前在京時見珩粗衣糲食弗顧其身閉門讀書不言富貴惟勸人行善事尙節儉似非矯廉者比臣雖未知其他長知爲有守之人也故謬以清廉薦舉以備皇上獎廉勵俗之萬一但臣自順治十六年奉旨終養回籍以至康熙十八年薦珩之時計二十年未見珩面殊不意珩之精力衰憊大不如昔也昨歲珩尙未入京卽蒙特旨補授刑部侍郎皇上重廉如此在珩身受要職自當殫心職業以報皇恩乃到部一年屢有過愆並無寸長聖度曲爲優容今科臣又參其衰老無才則珩之負皇

上實臣之負皇上也。總由臣識見愚昧。知人不明。既將珩一節之清介。輕薦於前。又望其勉圖補過。不卽糾參於後。自取之罪。臣俱無所辭。惟有席藁待罪。靜聽皇上處分。以爲薦舉不當之戒。臣不勝戰慄待命之至。爲此具本。謹具奏聞。康熙十九年十月二十七日奏。十一月初五日奉旨。這回奏情節。知道了。該部知道。

